

灌志文徵卷五

雜記

修諸觀功德記

末段專紀青城令
莫廷又功德從略

杜光庭



真誥云大天之內有十大洞天中有日月伏根三辰之精光照洞中明並二
景皆金城玉闕真仙所都青城卽第五寶仙九室之天也甯君居之黃帝乘
鸞車受龍躡之道拜爲五岳丈人司掌羣岳轍迹壇址於今尙存岳神於絕
崖之上六時灑水以代晷漏西極總真王君又領萬仙鎮茲洞府自然神鑑
照燭林壑值雨增燄因風散化其峭壁複崖轟如雉堞漈若飄霞謂之赤石
城亦名爲天國同體異稱蓋一山耳昔漢祚陵遲人鬼交雜鼓氛吹毒代殺
生靈太上命正一真人三天張君自渠庭鳴鶴頓駕茲嶺行明威之法清滌
林澤析衡萬里拔鬼城鬼市刻石爲天地日月羊馬臺三師壇命魔幢以誓

灌志文徵

卷五 雜記

鬼神各司晝夜丹筆畫山青崖中斷筆跡存焉經圖攸在絕頂曰上清宮首
冠羣峯秀出雲表傍有天池旱潦如一下曰接龍橋石梁懸架信靈仙之窟
宅也常道觀頃爲僧所奪開元十二年特敕移歸山內舊所御碑存焉詔賜
丈人真儀以祠宇爲觀是日仙雲成蓋仙露泣空天寶西巡望山禱醮卿雲
散郁靈蛇効祥中和辛丑歲僖宗駐蹕成都封希夷佳號驛騎降止龍吟洞
中尋以靈應疊申齋薦神鐘自響仙炬徧山肉角金蛇具於壇上枯櫻再茂
六幹叢生符瑞駢羅咸編青史景福元年壬子址峯之上石迸泉飛危殿巋
然當流不壞自此一派隆冬弗衰注於中厨無煩汲引非造化至神孰能與
於此也山中有丈人常道威儀洞天諸觀歲祀綿遠頽毀者多前宰博陵崔
正規渤海吳廷麻竝加繕飾將復舊基旋屬輦輅省方部邑供億不遑締葺
漸生敦墮雖芝檢星馳星車旁午十年之內無所增飾癸丑歲縣令南那莫

廷又奉敕常醮躬行奠禮閱其勝異痛此榛蕪不率私財不侵公用二年注意兩觀鼎新福地山祠各設其位刻石爲像用圖永年觀其虹繞迴廊翬飛廣殿明綴烏兔色籠煙霞雲棟風窗金碧交映虬簷鴛溜丹翠相輝俱斥淫奢克全大壯復命賜紫大德張素卿圖九江五岳之主十山四瀆之神妙極丹青彌加煥麗或周天展醮或黃籙開壇報國爲時惟嚴且敬固可以會真靈而福邦國也又老君觀晨容暴露棟宇傾摧示懋厥功創爲興置夫自然之化無爲之風宏之者至人也勤之者上士也勤宏不怠惟公得之

勝因院記

院在今澗口鄉隰阪山麓

文同

繇玉壘山南下過笮橋迤西循皂江左折越太平渡行深入曲無慮六十里至茂之汶川有地曰柘平羣山却立大陸初露畦麻噲稻杳遠空闊披墀帶麓壤土鮮潤景物瓌麗人物純篤就其佳處有院曰羅漢昔有頭陀德欽戒

灌志文徵

卷五 雜記

二

操甚嚴歲臘居久其徒委散是身獨在常懼其所將底墮落願擇高行屬以香火得永康軍大中祥符寺僧義海者付之至惟簡師凡五世也惟簡性潔所趣端慎守僧律作佛事癯形晦面不避風雨遠近四衆咸宗仰之既至此地乃圖崇飾伐木鐫岩大輯材礎構廣廈設尊像儲秘典納淨侶凡所欲有一一完具殆逾一紀功力方絕以名上列乃錫今號庭堂需敝檐宇飄動丹明碧照續繡崖谷誠歸嚮之福地而莊嚴之道場也惟簡余之邑人遠來求紀其事間嘗謂余曰青城諸峯惟大岷最爲高厚然丈人上清之望者乃世俗之所能見爾如吾所居正向其面脈絡表裏披斂出沒澗壑鈎蔓巒嶺曲折高嶺巨嶽巍岡險頂晨霞夕靄染漬輝耀湍瀑淙激禽蟲啼響一日萬狀無有窮極鬼眼傾耳不知厭倦此方外清絕之境世間奇偉之觀而惟簡輒擅有之山林之人所獲多矣安得君之車馬一至其地以幸吾言之不誣余

聽其說滾滾令人喜聞回視此身若處泥滓何時濯洗以從師傲兀於其間哉因命筆綴次其事使歸璩諸崑石遂以爲記云熙寧二年十月十五日記

聖母堂記

蘇惲

靈泉邑北直嚮馳道俯僅一舍地聚落帶鎮市去市徑行越距半里拔秀衆山環列崇阜遭廻巖嶺瞰若百雉城岨崒岑繚匯崛竦天外緜亘固護高揭雲表由其峰半挺設平岡健盤壯垣方秩千步中構佛宮領僧刹迨百室有古褚氏聖母祠堂在焉謹按隋開皇中褚氏名信相自江都來本唐安郡青城縣黑水溪人也黃冠草帶幼悟佛心葛帔練羣夙參法要先遊方外首下此山端擇勝趾芟薙芒枿科樹栝柏塵初地之位創安居之漸偃息禪梵韜秘聲味勤事大雄氏教本爲空寂師表日遞月進精一無怠當時所聞見者亦未甚悉而奉之適值歲歉田稼民傷饑饉則持龍頭小鑊散粥而飼之救

灌志文徵

卷五 雜記

三

拯生聚衆給千萬活病充疲咸告豐飫厥後以圓明相空俗身委化奉之者指其故地置祠塔以歸其靈俗議習傳號曰米母院俄屬唐武皇會昌歲削廢天下寺宇斯院與塔亦例除毀時革宣皇大中九歲白丞相敏中按節右蜀首謀興建尋得法潤禪師主之仍謀遺基再葺能事揭崇堂構殿宇廊廡牙閣宦室之備咸與維新就刻舊塔石繪其遺像遂設祠焉逮咸通中悟達國師知兀由長安來觀兩蜀名地寓此僑隱亦繼住持因題爲聖母院其山亦從而名之唐室下衰洊經王孟兩世胙土僭朔此地靈異之應愈新於人救旱乘時灼示爲霖之兆拯民布惠尤司及物之仁神變屢聞曾無曠歲炎宋大中祥符二歲府主密直任公中正聆其顯迹拜章聞上願賜名額未幾詔下院新瑞應之號至寶元慶歷皇祐之初亢閔時澤蜀土遘厲主府密直張公逸楊公日嚴相國文公彥博端明楊公察畢諭將校就堂祭請置府佛

廟設鐘梵焚獻以祈之匪夕而應甘澍浹於百里之內農稼稔字蕃固秋成
享大年之望洎三殿省丞潘公洞徐公汾劉公永咸出宰是邑軫民告雨來
拜祠下皆獲祥應著文賦詩大誌其異邇後動越兩蜀走巴邛絲綿漢梓遂
列郡縣鎮凡屬懋旱奔來千里請禱於前動皆協懇章章然以願從人其神
化之若是與夫包山奠宅庸立聖姑之名崧岳升高亦著啓母之祀可竝駕
而議其明效祠前舊刻李唐大中時朱道異撰記辭旨異懦頗肆誣誕尤不
可詳究觀其統載剋院時禳禱兩應祈之狀咸闕如也院僧惟膺懼其故事
湮廢因集其本末請序而申之貴乎聖母之遺烈斯院之所以興盡傳於時
不泯余故執筆爲錄其實

按青城山記補正云此乃靈泉縣之聖母山非寰宇記輿地
記所云之聖母慈母山也惟聖母係青城人因沿前志錄之

吳船錄節鈔

范成大

石湖居十以淳熙丁酉五月戊辰離成都泊舟合江亭下合江者乃岷江別

灌志文徵

卷五 雜記

四

派自永康離堆入成都及彭蜀諸郡合於此下新津綠野平林烟水清遠極
似江南亭之上曰芳華樓樓前梅甚多蜀人入吳者皆從此登舟其西則萬
里橋諸葛孔明送費禕使吳曰萬里之行始於此後因以爲橋名杜甫詩曰
門泊東吳萬里船此橋正爲吳人設余在郡時過此橋輒爲之慨然六月己
巳朔發家屬舟下眉州彭山縣泊單騎轉城過東北門又轉而西自侍郎隄
西行走岷山道中五十里至郫觀者塞途嚴妝盛飾帟幕相望蓋自來無制
帥行此路庚午至永康軍崇德廟在軍城西門外山上秦守李冰父子廟食
處也辛未登城西樓其後皆西戎山矣西門名玉壘關將至青城當再渡繩
橋長百二十丈分爲五架橋之廣十二繩排連之上布竹筴攢立大木數十
於江沙中輦石固其根每數十本作一架挂橋於半空大風過之掀舉幡幡
然大略如漁人曬網染家晾綵帛之狀又須舍輿疾步從容則震掉不可立

同行者失色郡人云稍遷數里有白石渡可以船濟然極湍險也晚至青城山曰寶仙九室洞天夜宿丈人觀丈人自唐以來號五岳丈人儲福定命真君傳記略云姓甯名封黃帝同時帝從問龍躡飛行之道本朝賜名會慶建福宮癸酉西登山五里至上清宮在最高峯之頂以版閣插石作堂殿下視丈人峯直牆堵耳岷山數百峯悉在欄檻下如翠浪起伏勢皆東傾一軒對大面山一上六十里有坦夷曰芙蓉坪道人於此種芎雪山之峯爛銀琢玉闖出大面後非留旬日不可登且涉入夷界雖羽衣輩亦罕到雪山在西域去此不知幾千里而瞭然見之則其峻極可知上清之遊真天下偉觀哉夜有燈出四山以千百數謂之聖燈所至多有說者不能堅決或云古人所藏丹藥之光或謂草木之靈者亦有光或又以謂神龍山鬼所作其深信者以謂仙聖之所設化也甲戌下五里復至丈人觀二十里早頓長生觀范長生

灌志文徵

卷五 雜記

五

得道處也乙亥十五里發青城縣丙子二十里早頓周家莊十里至蜀州郡

永康軍評事橋免夫役記

魏了翁

岷江至軍城之南其勢湍悍冬涸則連筏可濟逮夏而航多覆溺之患淳化元年安定梁公楚以大理評事來守此邦冬仍其舊夏則爲石籠木柵竹繩而屬繩於柵植於籠跨江而橋焉民至今賴之卽其官以名橋示不忘也橋比歲必一作費以鉅萬數而官吏並緣騷動井野民不得聊生王公之望漕益州乃以縣官斥幣加舊材估直下邑尉市竹亦庶幾知民疾苦者而吏所侵牟十有七八民復以控於常平事者爲治其事民賴以少紓然尙有修橋丁夫仍爲廣濟一鄉之大害蓋須三錢之賦半畝之宮亦例出一夫其爲役不過立木破竹運石而竹木未集護作之吏皂必先期督夫稍失期則係累之撈笞以千百爲旅曠日持久使民不得及時耕耨以養其父母其遠者至

自大面山下率戴星往返不下百里扑溪臥谷爲蛇虎所傷者又不知其幾也歲自春正月至於夏四月繩橋成又自秋八月至冬十月浮梁成以日記民之糶本於是盡矣役之隙惟夏冬之仲季四閱月耳復有繫橋撤橋之役使民終歲勤動不得休息吏又遷延其役不苛取不厭先是今富順守陵陽虞侯爲郡別駕以郡城至導江凡二十里所秋夏霖潦泥淖沒膝乃伐石甃涂山下夾植榆柳人率謂便客有謂曰東郊旣免涂潦之害西山亦侯之民也富順懼然曰子何以教我則具告以造橋之爲民也病者富順方議所以除之會去官今太守富順之仲兄也至郡首訪民瘼即石路與榆柳之未備者爲足成之且將推行舊議一日鄉之民詣郡願以其鄉所產茶額凡一引別於土產官錢之外更輸百錢依倣青城縣例官爲募庸以代已役庶各得以盡力於南畝侯不可曰使民至此皆有司之責也知之斯速已之尙忍苛

灌志文徵

卷五 雜記

六

辦於民邪吏或執其說則斥去之乃發郡少府錢召堰匠九十人始二月之吉番休度功日四十五人支庸百七十錢期月而罷其秋後亦如之具以列於臺府吳上諸朝前軍器監漢嘉張侯爲茶馬使者聞之曰此亦吾職也捐金五十萬以相其役山民大過望環一鄉之耄倪擊鼓鏜鏜拜舞於侯之庭至作爲歌詩以詠之侯乃登進其耆老而勞之且大書數語勉以孝弟力田樂輸省訟耆老舉手至額前曰吾年踰八十自始十四五卽罹斯苦不圖今日仁侯之拯已也各再拜感泣辭謝去已而制置大使資殿安公下侯所列書狀於軍與茶司俾永爲定例曰此惠當與大岷並爲無窮民益大喜始橋江面凡百五十丈率架空鑿虛工苟幸得稍淺地以施力傾搖異甚過者下瞰風濤掀涌心目掉動例疾趨以濟二年直橋之中江遽積石磧縱四百尺衝半之其勢方興而未艾也橋自是植柵有地當益安固亡可慮人以爲侯

之隱念有相焉乃相與議肖侯像築室於橋之西併大使茶馬富順同堂而祠焉岐山安世通隱居大面有年慷慨急義既詳顛末謂不可無記則以屬余余惟有生之類莫不同體人能恪共明命而無蔽於有我之私則凡天下之飢之溺匹夫匹婦之不與被堯舜之澤於我心將有戚戚焉而不能以自已者雖窮而在下所以堯舜其君民者亦豈非吾已分之所當爲况有社有民而足以行吾志者哉昔雍公爲名山茶官秩至卑也以沈黎輦運博馬茶歲妨農功乞以郵卒代民夫至今蒙其利其後大撫全蜀入相天子以生靈爲已任記所減放無慮七百餘萬緡使民有常心而天彝賴以不泯者其端實肇於此侯之爲人挺有祖烈自始爲郡崇正學以迪士習申孝弟以示民厚考室廬以舍窮獨培城郭以飭守備肅恭明神以教民昭事祈報蕞爾一郡亦既盡心焉耳矣今又以橋之病民爲之慮材鳩庸以蠲其勞俾不違農

灌志文徵

卷五 雜記

七

時官無小竭其力之所逮爲事無小循其分之所當止嗚呼如侯者誠能充是心也庸可限其所如往邪詩曰裳裳者華其葉湑兮侯之謂也夫侯名剛簡字仲易大使名丙字子文茶馬名震字東甫富順名夷簡字希仁

永康軍花洲記

魏了翁

永康之城南曰花洲者俗號果園榭翳榛莽歲久不治陵陽虞仲易父來守是邦更今名而築堂於其上取劉子臨河之嘆曰美功縱廣四仞其衡之長如縱而加一以嘉定之四年五月端午落成賓朋翕合憑檻縱觀逝川騰輝列巘獻狀嘉卉輪秀古木樛翠危堞突立長橋臥空奇雲落霞杲石霽月隨境變態應接不暇客曰嗚呼噫嘻此天地之閔若有待焉者韓文公記燕喜亭所謂斬茅而嘉木列伐石而清泉激天作而地藏以遺其人者蓋不是過也余曰是則然矣自有宇宙便有此江山高明傑特天地初無隱乎爾而亦

豈私於虞侯也山徑之蹊人惟不用耳用之而成路於介然之頃夫豈自外求哉山之所固有者然也惟人亦然與天地並立而爲三才居廣居也位正位也萬物備具無少欠闕人惟由之而不知其道故私意橫生自爲町畦而失其所以爲廣且正焉有能一日克己復禮而有以洞見全體則將隨處充裕不假外求胸次浩然直與天地萬物上下同流者矣今余於是洲也亦以是觀焉不然久矣其爲洲也胡昔之昧而今之章昔也過者弗顧而今遽爲部南之勝豈侯之力所能襲而致之邪侯瞿然曰非子不能發此子其遂以斯言記斯洲也是爲記侯名某乾道宰相雍公之仲孫余則臨邛魏某也

鐵牛記

陳鏜

粵稽古導江自岷山掠成都之南而東下成都之北水不及焉河渠書曰蜀守冰鑿離堆以避沫水之害引其水益用溉田疇之渠以億萬計蓋至是始

灌志文徵

卷五 雜記

八

分江通北道堰之始也沫蓋江之源云冰姓李仕秦有功於蜀民德之所在血食號曰川主其作堰之善遠不可考崖下有古刻曰深淘灘低作堰蓋治水法云至漢唐尙因之宋以後或失其法堰遂壞至元間有僉事吉當普者聚鐵石大舉繕治民亦利之然不能如李之舊不百年復崩我朝自宏治以來當事者百計修復隨築隨圯有司歲伐竹木歲役人夫費不下鉅萬民甚病焉嘉靖間太守蔣君憫其民思欲修秦守之政乃具其事以請憲副周君相度地勢求故址得堰之最要者九欲盡斲之石其都江堰當水之衝則石之外再護之鐵議者謹之計所費不貲會君隨赴任江西參政事遂寢憲副施君繼董其事曰事貴有序功貴因時鑄鐵之功易於斲石且要焉盍先之徐謀其後乃檄崇寧尹劉守德灌尹王來聘謀鑄鐵牛其費則議出公儲之應修堰者經畫處置甚悉蜀王聞而賢之命所司助鐵萬兩銀百兩時巡撫

李公巡按鄢公皆急於民多所因革執施君議深以爲然咸刻期勗之議既成時庚戌二月矣春水始發急切不能興功衆懼焉施君曰今即不及事不可以爲來歲計乎毅然爲之於是劉崇寧以君意晝夜勤事絕流浚沙鑿江底凡厥所需不數日咸集以是月二十四日入冶一晝夜牛成牛凡二各長丈餘首合尾分如人字狀以其銳迎水之衝高與堰嘴等坯冶之日蜀府差長史李鈞齎幣帛羊酒勞諸從事者民環而觀之者億萬歡聲震山谷間其父老皆合掌曰此吾子孫百世利也計鐵七萬觔及工費共用銀七百兩時各州縣多堰工舊逋君下令民樂之不數日輸既充費有贏水次居民棧急湍爲磨礪以規水利君弗以例禁薄稅之復歲得八百金故事修堰需舟車之類盡取諸民間至是皆有備不勞民力不費公帑矣僉事陳鑿以督學入灌口牛方落成往觀之曰物與水激其重必克數十萬之石可致而不可合

灌志文徵

卷五 雜記

九

數十萬之鐵可冶而合也合則其重并無尙矣水遇重不勝則洄而支支則力分而弱及其弱也竹木砂礫或可以當之故堰莫急於衝莫要於鐵嗣是而後若再甃之石如蔣君之所議者以歲舉焉其百世之利也李守故智要不出此時劉崇寧及通判張仁度尙有事堰上曰此正古人用鐵之意而未之發明也乃今知之請紀其事遂書之牛背後系之銘銘曰岷嶓既藝民之攸暨惟蜀之利岷江之陰陵谷變易亦有原隰惟禹之感乃啟後賢曰李冰氏乃鑿離堆乃堰江浔乃拯昏墊乃沃千里顧茲積石月儲歲蝕代有吏勤屢興屢踣蜀民警警勞此涪水畚鍤靡止百室馨只明嘉靖間守令則賢亦有憲副憫此下瘵謀用大作維力則艱施君繼之相時事事弗顧弗忌冰心是思乃砥洪流言鑄之鐵神人胥悅二丑崢嶸天一迸裂馮夷駭驚蛟龍怒咽犇突既定江沱既醴漑此萬畦豈惟生民籩豆餼饋郡邑十二惟堰之資

匪堰之力繫人之方嗣冰之功繼禹之跡爰有同心視此牛勒後千百年其永勿泐

鐵牛記

高韶

灌有都江堰自秦蜀守李公冰命其子二郎鑿離堆山剏築之以障二江之水爰作三石人五石犀以鎮江水以壓水怪以灌溉川西南十數州邑之田爲利溥矣堰下里許有門雞臺畫石爲水則者十有一尺及九爲利過則憂沒則患復刻深淘灘低作堰六字於傍以垂法於後歷漢而唐而宋相沿修輯率循其法久之湮沒至於元堰乃不治歲役兵民萬餘所費鉅萬民以重困時四川肅政廉訪司僉事吉公當普達觀要害乃召灌州判官張宏謀鑄鐵龜六萬劬貫以鐵柱壘石其上鎔鐵汁雜桐實油灰麻以苴其罅水利復興詔翰林待制揭公傒斯作記以表其功至於我朝舊功漸就圯毀有司歲

灌志文徵

卷五 雜記

十

令得水州邑役夫輸費修葺成化初巡撫都御史夏公塤以地遠者疲於奔赴令專供工料乃獨郫灌二縣雜泛科差專事力役宏治四年添設按察司僉事一員提督都江堰并各府州縣水利自是職有專任時輯屢省堰以不壞正德間水利僉事盧公翊督工修濬深及鐵版乃得李公前所刻六字置疏江亭用昭永鑑計糧派夫分班更役復啟蜀王得歲助青竹四萬竿以給盛石篋籠之用嘉靖壬寅夏二江瀑漲金堂簡資內江一帶水勢瀾漫駕出隤痕幾十餘丈浸淫四五日始漸以落丁未之夏復然江兩岸田地冲決見在民居漂洗靡遺寸椽蓋百年來所未見之災也適副都御史嚴公時泰重臨巡撫見之惻然過內江訪余問故余答以都江堰久失淘築之宜公領之入省即檄帶管水利按察司副使周公相洎成都府知府孫公宗魯選委成都府通判湯拱崇甯縣知縣劉守德督理堰工明年夏江漲及舊痕而止不

復爲患余乃作書爲鄉人謝大惠公復云此有司勤事之力時泰何與焉適周副憲遷秩去蜀每歲修葺類應一時之宜耳逮今庚戌春提督水利按察司僉事施公千祥慮公費之徒耗肆圖經久之計爰集劉崇寧同灌縣知縣王來聘議欲復鐵龜之制因言上年增立鐵椿三株貫石以砌魚嘴今水籠損其半而省費已二千餘金請制鐵牛以護石嘴計當益省歲費而工可久也白之巡撫副都御史李公香巡按四川監察御史鄔公懋卿二公撫綏激揚安養全蜀生靈之澤以溥而興利遠害凡可以加惠斯人者尤倦倦焉乃咸嘉其愛人節用之誼即日報可乃於堰口上三丈許製竹兜竹笆以欄江流乃淘江及底密植柏椿三百餘株實築以土與椿平衡鋪柏木於椿乃漫石板石皆長幾丈厚幾二尺復鎔鉄爲錠以鈴聯之乃鑄鉄版爲底作牛模其上施公躬率順慶府通判張仁度洎劉守德等誓告於江瀆之神李公之

灌志文徵

卷五 雜記

十一

祠命鑄工若干人分據大爐一十一座鼓鑪於牛模旁旋築土臺之上化鐵而瀉於槽以注於模內更用大鍋五十餘口陸續鎔鐵添澆以滿乎模凡用鉄六萬七千觔而二牛成屹然堰口中流以當二江洶湧之勢復立鉄椿三株於牛之下流以固魚嘴之石嘴下照常仍置竹籠竹捲護持之都江以固諸堰攸同初未即工前三日大雨不休鑄之日天忽開霽牛成而復雨時觀者如堵歡聲如雷咸謂神之祐之相之也蜀府遣左長史李公鈞持綵緞羊酒以勸施公而張通判劉知縣以次諸執事若干員下逮石工金工稿賞有差是役也鑄工凡百二十人爐夫凡千二百餘人鉄爲觔者七萬二千五百有奇炭爲觔者一十三萬柏木用價白金爲兩者二十五柴木用價白金爲兩者一十約共費金七百二十一兩惟蜀府助金一百兩餘悉出布政司原備修堰之物爲費不甚多而利可久堰堆旣瀦啟導以時不旱不澇非惟遠

品得免憂患而諸州縣瀕水稻田乃咸獲利民固樂其成衆咸嘉其績之偉
公蔣公翼後之人有所於考也復請於兩臺遣吏捐余記其事竊惟諸公
修堰之舉凡以利民遠師李公父子之意然循吉公舊築規石以固土木鉄
以固石加意益深而爲謀益遠所以甦民之頻勞而將以佚之於悠久也嗚
呼盛哉抑雖天造地設之隘固然且有時遷變矧石可轉而泐金可蝕而鏤
詎知數百載之下牛能歸然中流而不移乎無已則存乎人焉耳俾自是而
後有事茲土者果能心諸公愛民之心切溺飢由己之念繼斯成績無怠無
荒雖萬年一日也其爲水利尙有何終極哉是固諸公屬記之意也

臨江記

勞堪

隆慶壬申夏閱城至西隅據睥睨一眺青城積翠光動几席欲躡其巔求所
謂玉書者而岩嵐林氣相薄峯形或顯或伏愧茲凡骨取晒山靈徘徊久之

灌志文徵

卷五 雜記

十二

乃出郭西行數十步引繩橋陟離堆石壁對峙水瀉其間識者謂秦李冰所
鑿世爲蜀民灌溉之利焉已而循西澗二里許有堰曰都江即古灌口登崖
謁李冰祠樹木交蔭禽鳥變聲頗極幽勝下崖憑榭江若素虬音如浮磬噌
啞鏘鏘不絕於耳須臾神情獨得融然遠寄不知鞅掌塵在埃間也

都江堰記

陳文燭

灌縣都江堰蓋江之會也禹導江自岷山西入大渡河南通於汶歷於灌堰
在江中流爲二有南河者會新津有寶坪口分流爲三至於漢至於崇寧至
於華陽灌口堰外低而寬堰內高而狹水勢也作堰灌田始於秦李冰司馬
遷著河渠書瞻蜀之岷山大李公之功且云渠可舟行民饗其利蜀人廟祀
焉漢唐以及宋元堰法漸壞至元間僉事吉當普鑄鐵龜民利之昭代以來
屢修屢圯嘉靖間復鑄鐵牛詳在僉事陳公鑿記中其銘曰問堰口準牛首

問堰底尋牛趾堰堤廣狹順牛尾水沒角諸堰豐須稱高低修減水真名言也萬歷乙亥江大溢堰盡壞成都知府徐元氣灌縣知府蕭奇熊列狀修復巡撫都御史曾公羅公慨然允行後先軫念巡按御史郭公慮亦深長增以鐵柱令尋牛趾而濬之自堰之下如仙女三泊洞寶瓶五陡口虎頭諸崖間植三十鐵柱每柱長丈餘共用鐵三萬餘觔又樹柱以石護崖以堤水遇重則力分安流則堰固大都倣古云水利僉事杜公詩悉心區畫始萬歷三年十一月越四年三月工成費金三百灌溉千里民咸歌頌御史公適還朝復按茲土左布政使袁公隨右布政使潘公允端按察使劉公庠參政蔡公汝賢秦公淦副使王公原相僉事甄公敬共觀厥成燭聞而嘆曰蜀稱天府號陸海豈謂沃野不在人耶秦法作渠與井田並太史公論禹分二渠以引河其來舊矣如西門豹引漳水鄭當時引渭水足利於國中原變遷閼殫爲河

灌志文徵

卷五 雜記

十三

法多湮滅惟李公之堰幸存於蜀乃二三公修之俾古人之遺意千載如斯尙永賴哉今天下鑿者創新論怠者失故道及其不支則曰天也沒壁負薪何益焉假令人皆師古則隨山刊木之勳至今存耳甯獨一堰哉余益歎二三公經世之智云

灌縣治水記

盧翊

蜀守李公冰鑿離堆以利蜀刻深淘灘低作堰六言於石立萬世治水者法所以制水出入爲旱澇計者至矣其用功緩急疏密之序意自較然漢晉以來率用是法永嘉間李公羸深韞之唐宋相承世享其利元始肆力於堰無復深淘之意無乃公言不足法歟假令沙石湧積水不得東則雖鎔金連障高數百尺牢不可拔亦何取於堰哉矧所謂鐵龜鐵柱糜費幾千萬緡者曾未幾何輒震蕩湮沒茫無可賴方諸籠石廉省古今稱便者孰得比來民受

其困宜坐諸此予竊少之乃檄有司置鑿鑿鉅募役夫三千從事灘磧以導其流堰則仍民之便而已顧工多日少羣力告瘁未能勉其所欲爲究其所當止如公法云者恥也舊刻相傳在虎頭山鬪鷄臺水則立其旁歲久剝落索弗獲後之君子將無考焉因磨石重鐫碑則云

遊青城山記

焦維章

成都之西名山水而縣者以十數灌爲勝灌之山以百數而青城爲勝嘉靖二載季春月予友馮子廷器諗於衆曰青城之秀甲於益州天倉諸峯左右森羅削壁巖巖望之蔚然其翠欲滴予田於其下故能詳也諸君其弗靳於遊乎予將披石穿雲候君於青霄白石間亦勝事也予乃偕諸友刺舟渡江行平沙中極目百里漸進山下林壑之美已覺勝絕取道馬橋掠牛心山出橫山之下有小溪環崖而東可用灌溉以岸善崩水輒泄前令績溪胡公使

灌志文徵

卷五 雜記

十四

鑿之因崖爲岸民到於今便焉循良之利民如是爲之歎羨過橫山折而西至石佛灣田皆膏腴水四時不竭又折而西登小邱土地坦衍林谷迤邐望青城山長生觀等處尙在翠微烟靄間問諸路人始得逕北走里許有二衲持瓣香道旁迎之乃羅家庵也庵之所在中深外曲路入幽溪怪石扞牙蹄股相合不可步跳躍而徑始達少焉陰雨冥濛作瀟瀟聲矣急發南行一里餘雨亦霽比午後憩長生觀觀久廢頽垣敗礎與灌莽爲伍物之興廢蓋有常數讀東坡桓山之記不足慨也由長生觀西北行入山口山皆排闥擁澗夾路蘚篔簹鬱凡數轉抵建福宮宮亦荒蕪不治其前諸山蒙茸峒嶢望可千仞惟貧僧數人茗漿不具已而吾友周子良翰自大樂而至且攜酒及穀以進時已暝不可前矣迨晚風雨大作諸子且飲且悵以爲天師洞陡絕巖窺林深泥滑攀躋尤難其將止此乎吾友鮮于宗申等宣言曰不可止也且

宿一宵著屐再登我輩毋首鼠兩端以貽靈運之愧厥明飯畢出宮日光蒼涼掩映雲際週遭巨壑間丹壁峻峭割然大嘯類有人在空谷中酬和者西行崇嶺羅磴如立仰首俯膺而上氣息僅屬遠望有梨花一株燦如素錦即洞所在也復過上數重道甚湫隘纔可尺許旁皆邃谷易於墮陷凡行四五里得至洞下洞在石壁十餘丈上與徑迴殊前令胡公懸爲棧道沿入洞中中塑道陵像左塑唐明皇像或云僞主孟昶也山之奇峯清淑不可殫述右三十六峯次第呈露黛色如螺其試劍石等山遠近朝拱若服於洞之中山而岌然無阿附意浮嵐往來在我襟袖以及萬彙攬不盈掌天下之奇觀備矣然丹竈徒存白鶴不返所謂雲路咫尺不可以登者與洞有庵一所比邱者年可近百不御酒肉且云牡丹坪朝陽洞去此尙遠乃各酌數杯下兩腋清風殊覺有蕩胸之勢尋建福宮故道而歸路會馮子廷器延飲其家諸友

灌志文徵

卷五 雜記

十五

亦醉飽連日爽氣方騰塵襟又塞矣昔太史公登龍門探禹穴而後爲文疎宕有奇氣朱張二儒遠臨衡岳與道大適其時高邁之懷豈潦倒囂譁者所能與哉江湖余樂也此予青城之遊不可以無言也

重建馬祖寺記

范承德

粵稽姬周剖脅東漢圖丹此佛之自無而有也拂衣娑樹脫屣金沙此佛之自有而無也惟恍惟惚去來莫繫乃棲遑大千而無爲之寂弗撓焚燎堅林而不盡之靈無歇蓋寺有興廢法無存亡矣甲申乙酉間時際陽九蜀寺之燼於祝蝸者百無一在愚者悲其塵劫智者參其涅槃然則寺之興而廢廢而興其即佛之有而無無而有乎馬祖寺者僧寂曉之所重建唐有禪師馬祖飛錫於此遂以名寺左則岷江泐泐百川之所分流右則青城崔嵬千巖之所競秀旣麗且崇故老猶能道及洵勝境也寂曉斬棘披荆伴狼眠虎神

疲精瘁積黍成銖執事十一年始復其舊莊嚴輪奐高爽豁達較川中邇年所創寺殆有過之夫衆擊則易爲力獨任則難爲功信乎寂曉之功爲不可沒也康熙十一年三韓范承德記

原文稍節按明清間蜀遭兵燹所在邱墟記稱伴狼眠虎其荒廢可想惟以馬祖卓錫於此則大誤詳徐涵記

書都江堰事

林 儁

都江堰自通佑王顯英王開鑿而成實爲萬世之利垂諸志乘者章章矣每年水發時視寶瓶口之水則十畫以外爲足用嘉慶己未春堰水縮逮三月秒尙不及四畫鄉民懸耒蹙額奔集會垣環輿相告曰十日水不至田且石矣時萑苻猶竄伏於川東北而成都爲根本地倘復遭無年之厄則其患方大心切憂之因念神靈異非常予曾司水利十有八載每遇旱乾有求輒應爰齋心致虔遣水利同知丁葵籀率縣尉黃漣匍匐往禱爲民請命禱之明日水汨汨至未及一旬江流湧集水則已至十畫有餘一時溝澮皆盈合郡

灌 志 文 徵

卷五 雜記

十六

蜀民無不額手稱慶恩波洋溢萬派爭流如鼓答桴如鐘報莛於以知神之所以保護民生者效至速而利至溥也既遣經歷司呂柱石報賽崇祠並書此以志神功於不朽焉

改遷曹烈女墓並勒石記

朱凌雲

烈女曹氏字保姐未笄有惡少年挑之投以金不辱被害蕙心松節一時無兩矣墓在徐家渡東牧子漁人敬之罔敢褻乾隆間賜帑建坊惜江皋風雨侵蝕歷年未久而圯惟墓尙存因念烈女藏魄沙州岷江歲漲岸易崩塌能保其永無患哉適邑侯常公補修縣堞命吾儕巡功乃以遷墓事告公命卽行之爰就石羊聚之南購地一區卜吉改瘞焉顧閱十餘載猶未勒石抑亦缺事乃鳩工刻篆庶後之過此者覩豐碑而景芳蹤正氣於以不沒也予擬題一聯云勵志直同塗面女潔身尤似墜崖人亡友任儼見而續之云頭輕

壠貴猶男子不道香閨罕匹倫凡以烈女之身如堅冰皎玉勝於陌上羅敷徒作歌以自明者矣或曰保視曹娥何如予曰娥出父尸孝也保拒強暴貞也孝以報親貞以全節皆奇女子何可軒輊第娥有黃絹幼婦之辭而茲無片石可乎此所以既遷其墓尤須樹之碣也先是瀋陽一樵孫公創修縣志屬予參校與同事偶倡此議皆曰召南行露死麋之化即此足以培之勿見義不爲貽士林羞今始得畢其事焉同經理遷墓者明經任君儼文君眸然太學帥君國愷同董治鐫碑者諸生郭君登高吳君綏南及予長子映陽也嘉慶二年孟春月記

改葬曹烈女記

徐鼎

烈女曹氏灌縣河西人未笄而高氏子者誘以金義不辱被害乾隆間賜金建坊如例邑乘載之詳矣墓距徐家渡里許都人士懼江漲之逼無以妥貞

灌志文徵

卷五 雜記

十七

魂也乃於石羊市南捐金卜吉改瘞焉且請誌予惟節烈根於性發於情激於義而成於氣彼鬚眉男子平日矜言節概高語志行一旦臨利害遇事變輒情隨境遷言行不相顧烈女以弱質當強暴獨能舍生以全節斯其性情之正義氣之充爲何如予不文未足以闡幽芳彰奇蹟而都人士之好義則足多爲書於石庶過其壠者皆慨然於節義之足重與嘉慶四年稽山徐鼎記

城南別墅自序

馬光型

天下多佳山水以余所至如京口之金焦北固武陵之孤山葛嶺蘇臺之支硎鄧尉以及信州之雲臺象山藐姑之屬秀異奇瓌迥出塵表然皆遠在異鄉豈能括爲吾有余灌當蜀道西衝江流自此出口秦守離堆故蹟存焉其南則青城三十六峯環拱羅衛蒼翠滿目道書所稱寶仙九室洞天者山水

之秀實甲全川甲午夏偶於城南得隙地一區廣周二畝聊構數椽而居製
猶未備旋即北上至乙未得官後燕臺奔走殆將十年俗狀塵容貽笑山靈
久矣壬寅春乞假歸里乃就其處復構大廳三楹船房數間垣牆齋室略備
臨江建亭曰鏡心蓋取江水之清可以鑑我心也宅旁植梅數十本外則桃
李桂蕉蘭菊竹柏之屬額曰第五洞天居士盧遠望靈岩玉壘伏龍棲鳳諸
勝皆在襟袖昔王右丞卜築輞川見者以爲身在畫圖中前賢高致殊不可
及竊嚮往之至於誇土木之崇侈逞讌遊之權娛則非余志故從略云

兩修都江堰工程紀略

強望泰

書云弗慮胡獲記云慮而后能得此在一身一家之事猶宜措置周詳矧都
江堰千支萬派溉十四州縣之田活億萬黎民之命是烏可不熟思審處蘄
盡有司之職哉余荷先忠烈公於廕欽賜科第由翰林改中書奉職十年深

灌志文徵

卷五 雜記

十八

以析薪弗克負荷爲患矢勤矢慎幸而無愆道光丁亥仲春選授成都水利
同知孟冬蒞任周歷各堰至索橋上內外江分水魚嘴處見江口寬四十餘
丈江身自舊河口起至寶瓶口訖僅寬四五丈十一十二丈不等江岸一帶
積沙石踰數丈江中爲沙石淤塞更甚各堰籠堤亦冲刷損壞者過半因延
訪紳耆披閱志乘細繹深思求所以治之之法覺稍有會於深淘灘低作堰
之本義堰之作也始於秦守李冰鑿離崙開二渠其關鍵曰都安堰而內外
以分堰在今灌縣治西也其云深淘灘者所以防順流之沙石不使淤入內
江也低作堰者所以使有餘之渠水便於洩入外江也推明其義因於是冬
興工卽多加河防廣作埤籠深去江底之磧石低砌籠埤之層數戊子春夏
察看水勢六字之法覺果有驗旋於各堰一律如法修治竊冀數年後可復
古制一勞永逸不意兩修後余卽有懋功之行也夫天下事好奇者矜新法

耽逸者曠先型堰工不遵六字修理歷有年所矣余不敢自作聰明無事不師於古爰將兩次承修各工紀略於左以誌千慮之一得後之覽者或有取焉一七年淘挖內江江口長八九十丈寬十五丈均深五尺餘寸八年察看江底較七年約深二尺餘寸是年復加挖一尺餘寸今年底較上年添約深三尺餘寸一挖去古江內沙堆約深三尺寬十五丈長一百餘丈使水可引入古江新開江口將來可以漸次淤塞一鎮夷關脚下七年挖深五尺現一石與山連圍圓約一丈許詢之胥役僉云每年若見此石即不淘挖余諦審其言不確乃命石工鑿去一尺餘寸使與江底平八年江底較鑿去石又低一尺因又鑿去二尺五寸使與新河底平一緊對臥鐵碑下江底七年淘深二尺現出木椿與江底平八年江底較木椿低一尺五寸命將木椿鑿去一尺五寸使與江底平察省志此處有明時豎立鐵椿數根余淘覓數十日不

灌志文徵

卷五 雜記

十九

見因亦豎鐵椿一根於江中南去岸五丈二尺北去岸四丈六尺顛與淘深之江底平豎處亦與臥鐵碑相對一鬪雞臺下向有淤沙一堆高丈餘周圍約六丈許余命挖與水面平但其旁係深潭七年淘挖時恐人夫將沙石棄潭內被水冲復起仍成淤集因逐日親往督工命擔棄遠岸役夫中有老而點者跪余前云伊在堰淘挖三十餘年此處沙石歷來盡棄潭中余知其謠卽昏夜微服諮訪未聞有云類棄潭中者但察實時已傾潭中大半矣以致八年此沙復堆淤寬六丈高五尺余仍照七年督挖去盡不令棄片石於潭中是年此處江底較七年挖低二尺餘寸因於北岸石上深淘灘低作堰六字旁添刻水則十畫初畫令與河底平俾農民便察此處之深淺也一內外江各堰沙石淘挖均須傾棄遠岸水漲時庶不致冲流仍集江內一寶瓶口江身舊寬十二丈七年察量僅寬七丈餘余於是年展寬一丈長二十餘丈

深約五丈八年又展寬三丈長四十丈深五六丈不等仍復古制使水出口勢得舒暢並將所挖沙石置北岸城脚下堆砌成坎上坎約高一丈餘寸寬三丈長三十餘丈下坎約高四尺寬一丈三尺一走馬河鎖龍橋下本係有工處所聞堰長云數年來並未淘挖余於八年仍添挖七百餘方又上漏罐轉逼水瀾南岸向無挖工余見此處沙淤甚高亦添挖四百餘方又有漏罐轉灣處余見江身淤窄亦展寬一丈許以上七則均遵深淘灘法也一自鎮夷關起至人字堤止江身展寬一丈五尺一飛沙堰係歷來古江七年此處橫鋪籠裝至十數層又加裝以篾子籠因江底高籠亦作高夏間水漲余親往察見水不能洩入外江當卽割籠二層使洩餘水八年江底挖深因此籠亦低作較上年矮去數層此遵低作堰法也一人字堤邊漩坑向來用籠滾填填齊水面方用橫鋪填心籠二三層裝砌上又用搭包順籠蓋面七年余見

灌志文徵

卷五 雜記

二十一

所作甚不得法八年余令堰長夫頭用篾繩繫籠頭中尾三處籠入水時令人將繩扯緊使籠至坑內不致倒臥懸栽亦不致溜入潭內籠離水面約三尺卽令泅夫下水用竹篾將籠連環密縫出水面時仍照水籠裝鋪順籠六層又裝鋪橫籠一層上始用搭包順籠蓋面親督九日而工始畢較之上年似更堅固一內外江各魚嘴籠盡以竹篾穿繫夏水可免冲刷至內江大小各堰籠工因地制宜俱略有更換處一內江各小堰察江身向來寬敞均與江口等今江口寬而江身窄盡係居民侵佔所致極應恢復古制一時勢有不能一太平橋魚嘴上沙石積高數丈走馬河南岸沙石亦淤堆數丈鎖龍橋上下沙石俱積滿兩岸盡是居民田舍察訪俱是向來河灘也一伏龍觀南岸察係舊日考武童箭道因乾隆間人字堤開口此處被水冲刷箭道遂移東郊余於是處植柳八十二株欲爲將來辦工界限也一門雜臺對岸有

大沙堆余於八年工竣後捐廉雇夫將沙挑至人字堤下與籠基平集約寬二十丈長十六丈深三五尺不等竊謂沙堆一去洩水入外江隄工可以永固也一自鎮夷關對岸沙堆起至現挖之沙堆止共約長數百餘丈盡擁隄後堰雖低作恐仍無益余以有志未逮而去所望繼余而來之賢執事將每年新淘沙石盡傾遠岸低處將舊堆沙石量力漸挖使低堰仍低作方合昔人低作堰之法以上各條皆體量情形盡心辦工之法余固知糠粃在前珠玉在後毋煩行者之灌灌而杞人之憂有欲已而不能已者凡以效矇叟之誦也若謂慮遠說長則吾豈敢道光二十年二月在三泊洞上游挖出鐵椿一根長一丈徑五寸上書永鎮普濟之柱明萬歷四年造字三寸卽移緊對臥鐵碑於此豎鐵椿一根將此鎮椿鍊合一處以壓河底俾後之淘挖者知其淺深云爾

灌志文徵

卷五 雜記

二十一

新建文翁祠記

強望泰

岷阜之山江出其腹自羊膊嶺而下所受者不一派所度者不一峯計其所經則千有餘里矣至於灌而衆流大匯出險就平於是乎可醜可堰而蜀之水利興焉顧水利之興始於秦李冰繼則漢之文翁而人第知有李冰而若不知有文翁者何也按李冰鑿離堆穿二江見於史記河渠書至華陽國志亦稱其雍江作壩灌溉三郡沃野千里號爲陸海文翁之穿湔江口灌溉繁田千七百頃華陽國志志之而漢書文翁傳則未之及本傳稱文翁好教化選郡縣吏開敏有材者張叔等十餘人遣詣京師受業博士數歲蜀士皆成就又修起學官於成都市中招下縣子弟以爲學官弟子由是蜀學比齊魯本傳獨於此事詳哉其言之豈教化者致治之本而水利僅惠民之一端故從略歟或以華陽國志穿湔江口云云恐涉附會然常璩晉人去漢未遠且

係蜀人非得於外史之所錄卽得於故耳之所傳若未有是事而姑以是附益之豈其然哉且夫有成有毀者數也有創有因者亦數也自秦孝文至於漢景世閱兩朝年經數代安知李公當日之雍江作棚者月齧歲蝕不久而卽圯耶經流旁溢則下流必日淤故道必日湮翁從而穿之亦事之所不能已而理之確有可信者凡事每由成而漸毀因毀而復成創之者難因之者復不易人第知有李公而不知有文翁亦習焉不察耳夫文翁則何可沒也記曰有功德於民者祀之二王廟在王壘關外大江邊國朝封冰敷澤興濟通佑王其子二郎承績廣惠顯英玉以故呼爲二王廟至文翁則未有專祠功德同而馨香之報異不惟前賢之遺跡鬱而不彰且無以發後人企慕之誠謂非缺典乎哉余念及此輒不能釋然於懷欲剏建焉而難其地去年因修太平街道偶於街側得官地一區介居兩水間前對青城其山如畫如繡

灌志文徵

卷五 雜記

二十二

如拱如揖獻秀呈奇天若有意而爲之余適無意而得之躊躇四顧此計遂決今年春鳩工庀材閱五月工竣計祠三間左右兩廊各四間前門樓後圍墻又各三間四壁皆用火磚封砌其址則甃之以石鋼之以灰祠外繚以長垣凡數十丈惟其堅不惟其脆惟其樸不惟其華可以肅觀瞻可以通胖蠻而余夙昔之所不能釋然於懷者至是而一慰焉余幼服先君忠烈公之訓見義必爲然不敢一毫妄費尤不敢一毫妄取自道光初年承乏來川職司水利迄今十有五年每年淘灘作堰躬與役徒爲伍雖嚴寒風雪不敢告勞而清俸所入省衣縮食以此稍有贏餘是役所費計錢一千五百餘緡皆余傾囊而出之者一甃一瓦一木一石不敢取之於民誠念躬居民上於我民毫無補益若更以徭役相累則疚心滋甚義所當爲勉而爲之或以余爲喜事又或以余爲好名是豈知余者哉夫余亦行其心之所安焉耳雖然今日

之祠自無而有安知異日之祠不自有而無百年以後或不無傾隕之患後之君子加以修葺豈爲余嘉賴之將神明在天之靈實式憑之二王廟主以黃冠香火盛甚此祠僅置看司一人用司啟閉一喧一寂各得其宜無庸例視也初買龍姓地二畝餘又買黨姓地二畝餘所入之租可給看司一人費事無巨細久則弊生備書之以貽來者使其有所稽覈焉

新建棲流所記

強望泰

救人生命所損幾何特飽煖者不知饑寒之苦遂漠視焉夫乞丐緣饑寒而病無所棲息則愈病若覆以空屋俾免於雪虐風饑則調息甚宜得免於死何必廣廈萬間哉灌偏重山天寒尤早爰於西門內構屋三間名曰棲流所使蒙袂輯屨者獲所安以延殘喘非敢市惠亦以畢吾之願而已若夫拓而大之且待後之君子

灌志文徵

卷五 雜記

一二十三

猛將廟記

強望泰

劉猛將神者盛傳於江南凡民有事田間奉神惟謹道光十七年江蘇巡撫陳夔上聞特加祀典見於邸報蔡君成輅吳人也署灌篆時適苦兩稻生螟騰乃率民設神位禱輒有靈是年秋大熟報賽立廟祀焉竊思神之賜福江南已非一日今因蔡君治灌蜀民亦被其澤是神猶水之在地無往而不應寧復有畛域哉惟其事略傳說互異然朝廷旣頒秩祀必有所據矣姑應蔡君之請而記之

愛棠亭記

劉沅

道光戊戌夏斗米千數百錢饑民嗷嗷朝不保夕邑宰蔡公成輅百計振撫民賴以生是秋大熟禾有雙歧之瑞邑人感戴公德巷舞途歌作坊坊名嘉禾別有記與亭以誌遺愛實心實政天人交感能毋望餘風而興起耶故備書之

道者天理而已天理全備於人故得道者卽與天通而神化不測自聖功罕詣學者不知人之所以合天又安知神之所以爲神大禹之治水也開巫峽禁支祁書籍皆傳異跡而岷山導江不聞蓋夔峽未通羣壑無歸江故橫溢去其雍滯初非有憑以爲殃者耳岷嶓旣藝沱潛旣導則貢賦已列梁州又安慮民之困於昏墊而不然者周室井田疆素庸蜀齒於蠻荒羌髳分踞安有經猷故溝洫之制漸頽而華陽國志所以云禹導江之後沫水尙爲民害也水由山曲亦籍山維二江未分離堆支於山麓水繞其東而行奔流駛瀉蜀郡俱爲魚鼈非李公岷興民安得而耨耨且夫有非常之患必生非常之人彼蒼仁愛斯民往往而然亦非獨李公父子也公釃二渠斬潛蛟約水神瘞石犀皆合幽顯而持著功能與大禹治神奸驅蛇龍先後一轍非得道於

灌志文徵

卷五 雜記

二十四

身安能有是且公治水非一處襄之者亦非一人若南安榮經等處皆嘗及之故離堆之事譌傳而同時若竹氏毛郎亦贊厥勳二郎其尤著也二郎固有道者承公家學而年正英韶猶喜馳獵之事奉父命而斬蛟其友七人實助之世傳梅山七聖謂其有功於民故聖之惜僅存其名又亡其一亦考古者之憾矣公本猶龍族子隱居岷峨與鬼谷交張儀築城不就兼苦水災乃強薦公於秦而任之公營郡治致神龜立星橋通地脈功業非一因其治蜀治水益州始爲天府故世稱曰川主而世俗不察第以爲其子二郎之功夫善則歸親人子之道况二郎實助其父史傳朗如安得舍公而專祀之哉誓水碑在天彭斬蛟在灌口石犀石牛不一則自導江至郡皆有之舊多朦朧愚爲詳考著之於書今門人王惠榮刊愚江沱考辨等於公廟而賢士大夫又求約公之事於石亦闡微之盛意也故不辭而復爲之記

馬祖寺記

徐 涵

馬祖寺古號承天邑志譌爲馬祖禪師開建又言示寂於寺此失考矣按李調元什邡羅漢寺碑云馬祖者達摩師傳入中國之第八祖大寂禪師也名道一什邡人父以賣簍箕爲業生於唐中宗景龍三年己酉容貌奇異出家於羅漢寺後聞七祖讓大師道行甚高因往南岳詣之初至獨坐一菴惟習坐禪讓師觀其神宇有異聞其姓馬忽憶六祖有脚下出一馬踏殺天下人之偈乃多方引導一日將磚於菴前磨馬祖問師磨作甚麼師云作鏡馬祖云磚何能成鏡師云磚旣不能成鏡坐禪豈能成佛馬祖云若何卽是師云譬牛駕車車若不行打牛卽是打車卽是汝若坐佛卽是殺佛馬祖言下大悟師遂以心印付祖復歸什邡羅漢寺築說法臺臺角穿井爲衆說法大闡宗教邑人稱爲活佛中有老嫗來觀云此吾並舍馬簍箕子也何云活佛祖

灌志文徵

卷五 雜記

二十五

聞之作偈云學道不還鄉還鄉道不香遂往江西開元寺演教德宗貞元四年二月庚辰忽謂入室弟子百丈山大智曰吾至某日當還爾其識之至期委化春秋八十左僕射權文公德輿爲撰墓誌銘據此則馬祖未嘗至灌說法何言示寂於寺乎意者弟子飛錫於茲奉其師說遂易承天爲馬祖云爾由唐及明碑文失載建置莫詳然自國初醉月和尙插田千畝皆係常住舊界一邑之大叢林也醉月者名寂曉臨邛彭氏子幼投海印師爲徒中參燄虛燈禪師居寺中執事十五年維時寺遭流寇焚掠之後僅存金剛一殿獨脚一坊康熙己酉知縣事馬公璣憇憇之始修大雄無量等殿并齋堂廊庫雜宇俄厭煩擾閉關絕粒日僅飲水適丁吳逆作亂灌陷於賊遞二年而和尙坐脫其徒炤識接丈雪法師主馬祖席於丁巳年作中佛戊午年作左右二佛己未吳滅康熙三十一年癸酉奉命委員覆驗馬祖寺田界炤出寺條

糧五兩餘雍正七年己酉奉命委員丈量田畝炤出寺條糧十兩餘嗣續承買計田千畝有奇載糧十四兩二錢八分殿宇完整林木葱蒨洋洋偉觀也每歲正月九日十方進香朝覩人山人海寺外百貨駢集其有成都藥市蠶市遺風哉近因方丈數易支費不敷予母相權累二千餘金主席不常禪師謀諸市衆詢於紳耆稟縣主李公於林中無礙處擇售柏樹六十株償債餘金三百贖田二段寺無殘敗之憂僧享平安之樂而今而後吾知其日新月盛踵事增華不負天人皈依也禪師以碑誌譌缺疑信交參更勒貞珉囑余爲記乃詳述馬祖本末及醉月開創自世祖定鼎迄今上嗣大厯服一百七十餘年住持不一人所作不一事各宣乃力克觀厥成夫功莫大於復古罪莫重於忘祖顧名思義祖鏡有不長明者乎

補修伏龍觀離堆記

胡圻

灌志文徵

卷五 雜記

二十六

同治甲戌夏六月予權篆灌邑進香伏龍觀周覽廊宇於前殿後壁讀建昌黃祥人觀察題川西第一奇功六字後跋云離堆對岸舊有石插江心卽三道岸同治初某觀察以桴行不利決計鏟去江水遂直衝離堆向若可去李公何吝舉手之勞今去之他日必重受其累但願吾言不驗則益州之福也旋詣後殿則見離堆崩塚一角廊房傾圯楹柱虛懸詢諸父老述及自鑿三道崖後成屬十餘州縣連年旱澇衝毀農田不下十餘萬畝地方受累無窮嗚呼黃觀察之言果驗矣爰謀修復離堆舊制其工甚鉅著手尤難因與邑紳山長陳輔廷職員張贊廷汪祥荃諸君子商酌籌修又黃兩河紳糧勸捐成款用墜石層疊壘砌上以大木橫排鋪石築土並將塚處改建一樓以觀水則用復舊制捐款有餘又將鐵佛殿升建樓龕移佛於上中開正門以通出入俾會期士民進香者不由左角小門而入免致擁擠工雖告成而三道

崖尙未籌修恐離堆仍難永固見已請於上台酌籌巨款更有望於急公好義者共襄其事焉光緒元年歲在乙亥仲春會稽胡圻記

青城常道觀修路記

黃雲鵠

常道觀即天師洞青域名勝遊者僉知山路險峻林密苔滑予前守郡未及到重還蜀得暇三遊焉道皆甃石雖峻面夷殊利行道七告予曰此邑紳蕭君杏村蔣君校菴戴君小岩張君秋坪黃君遜廷之所議募而釀修也計自同治癸酉訖今光緒壬午凡十年自山下青城橋抵觀前之迎仙橋凡五里計費白金一千有奇石之塊以萬計功幸告歲願爲文記之予惟遊青城者非慕仙靈即蘄福利二者皆非積功德不可功德之大者孝親忠君次卽濟人利物修險路以利行人功德之章章者也亟誌之以諭來者

修復長生宮記

黃雲鵠

灌志文徵

卷五 雜記

二十七

青城山下長生宮范賢隱居之所也攷志乘公名寂字無爲蜀漢封逍遙公李氏尊爲范賢封西山侯加太師丞相至欲以爲主並不受其胸中蘊蓄何似卽無長生久視之術亦足風高百代矧齒越恆人數倍耶且因公盛德感孚保全青城七民無算可不謂仁乎又傳記載武侯掘地得蠶叢碑五字人莫能辨公獨識而解之所言後一一驗可不謂神乎仁且神廟食茲土宜矣顧自宋姚平仲請列祀典建長生宮以來代有興廢明季獻賊之亂舊址僅存國朝雍乾間有鄒道士復昌與其徒鄒本參張本珍闢草萊居之次第興復至道光二十九年有武博士僑此火其弓不謹遂遭回祿廟全毀時住持道士戴元宗楊元茂憤志修復因廟產之舊銖積寸累鳩工庇材不假欣於外人不乞援於當路至咸豐九年始歷十餘歲而廟貌俱復前祀逍遙公廟所由起也其地卽公隱居之赤城閣蜀後主易爲碧落觀之故址次祀南嶽

次斗姥不悉所謂因俗也背山面野茂林修竹蔚乎隱隱之青城者首途陟此靡不流連歎賞烏知二道士修復之功不易其不乞助當世自竭其力與費以全昔賢之名蹟尤爲方士所罕觀歲三月予遊青城往復信於此從道士請爲文記之柳予觀李鼎祚所集九家易解中有蜀才易註多主卦變之說攷蜀才卽范賢蜀中志乘不載儒者罕悉其名而道士家猶能尊之吾徒之遊青城者得從而拜之然則茲廟之修植培護其可已乎哉

青城山重修建福宮記

黃雲鵠

光緒十四年戊子冬青城山長生宮盧道士奉其師楊君元茂命以重修建福宮告成乞予爲記予再官西土較前多暇已卯庚辰壬午之歲嘗三遊青城吟詠流連與山靈結締深矣建福宮當丈人峯之背距常道觀上清宮長生宮均五里許面飛仙觀前臨谿澗山水迴環形勝幽奧入青城者首塗必

灌志文徵

卷五 雜記

一二十八

經此宋時建祀丈人日久傾圯長生宮楊道士傾囊重修大殿舊祀世尊及趙太守呂真人前殿新祀甯封子杜光庭二真人茲山先代尊宿會享於此可謂數典不忘祖矣所在名山多有名宿棲息不獨青城爲然而青城尤爲都會甯范趙杜其顯然者也予於蜀中山水最愛青城三遊未厭殆有夙緣何時得乞身邀允當乘暇四遊信宿建福宮以副青城山靈及楊盧師弟之願是歲小雪日夜滿三下前權臬分巡使者黃雲鵠識

修青城丈人觀神像記

清光緒七年

黃雲鵠

青城爲仙靈窟宅趙李張范靈蹟昭然開山最早者莫如甯封子載在高士列仙諸傳非誣也唐宋以來代加封號見諸陸務觀范致能諸名人題詠者皆可考余兩遊青城始尋得其處徑涂偃仄棟宇荒頽殿右角有小像乃咸豐間王居士培基所修體制未崇從遊盧居士靜虛曾安鑑比間云茲地是

上元宮祖堂予昨過上元宮覽其碑記良然住持祁道士頗喜修建其必重新此地無疑矣廬道七乞予爲倡乃允捐修丈人石像一尊高與人等聊爲嚆矢至於遙觀厥成則在觀主人與青城父老及由觀分出之諸黃冠

小朝陽洞記

黃雲鵠

青城勝概不可枚舉而余獨愛朝陽洞於西側一山洞尤愛之以得朝陽最早故也題曰小朝陽洞爲詩紀事越歲餘道十因而屋之落成走相告余是以有三遊青城之舉至之夕大雷雨明日晴霽景象彌佳愈愛之信宿洞中級日乃去則未知余之僻嗜與抑勝概果甲於青城耶古今之大天壤之遙可愛賞者何限而余獨倦倦焉於此隘矣夷惠盡賢後人妄分工拙施媪并美好者各有妍媸余不致謂此洞果佳勝然美被信宿其中朝暉暮靄谿月松風大野平疇連峯疊巘實能移人情志一蕩滌穢濁姑爲文刊洞側後之

灌志文徵

卷五 雜記

一十九

遊者若與余同癖則請襍被信宿其中一驗余言信否若謂不然則請一覽卽行山中寒氣逼人願勿久留也

離堆伏龍觀題壁記

黃雲鵠

同治十年四月久旱禱雨弗應人言離堆下有伏龍祀之可得雨乃單騎馳請齋宿觀中累日臨崖盼雨因得遍覽內外江諸勝與象鼻魚嘴泮缺人字堤水勢衝截渟泐分張迴合之所以然慨然歎李太守真神人宜血食千載其神明所照功之所及亦實足千載後人率而循之終古無弊可也離堆對崖曰虎頭崖舊有石插江心同治初某觀察以桴行不利決計鏟去離堆益當江衝桴滋多損嗟乎前人深淘灘低築堰六言之微旨雖合內外江通言之其樞機實握於此向若可去李公何恪舉手之勞今去之他日必重受其累但願吾言不驗則益州之福也因題六言壁上曰川西第一奇功用申景

仰且附記數言志恨以儆後之私智自用敢於壞古人成法以厲民者

重建奎星閣記

朱紹顏

灌縣學宮在治城北隅負玉壘瞰岷江左右兩峯並峙其東峯爲奎星閣故址而形勢稍弱昔人建閣於上以振之秀拔穹窿與西峯並自閣廢而文風寢替矣我國家壽考作人當斯景運而謀續囊徽抑亦盛舉諸君子寧無意乎爰率同儕揮玉輸金大栽培於聖域勸功助役廣積累於靈壇有補斯完無虧不滿行見清和蒼萃之休不減於昔而人文蔚起之盛復覩於今矣

重修安瀾橋記

張繼

凡事創始爲難而因之仍舊尤難創始者以意爲之有便於民民卽安焉因之者少不如意未有不議其後者灌邑城外之繩橋由來舊矣余於戊子春因探視水源至其處見纍纍然如長虹之飲澗蜿蜒而通於南北岸者其柱

灌志文徵

卷五 雜記

三十

皆新豎篋皆新維板皆新削上有樓旁有欄無一不新者詢之民曰是非所謂繩橋者耶其舊耶其新耶民曰橋雖舊製邑宰朱公其新之也去歲秋水泛溢橋皆烏有兩岸之民不利於濟朱公乃首捐廉并邀邑紳之好義者始終其事橋成如舊觀焉至其柱之小者大之篋之細者粗之板之舊者新之樓之偪者寬之欄之疏者密之應有盡有有過之無不及也余曰噫因之難矣因之仍舊尤難矣而因之過乎創始則更難乎其難不畏其難而始終其事此朱公之過人遠矣及晤朱公語其所聞詳其所以朱公迺出所作記示余原原本本非余之所能爲也夜歸寢齋中灘聲喧枕上不寐起而剪燭書其略云朱公號越卿年三十五歲宰斯邑浙人也

嘉禾亭記

劉厚滋

道光戊戌春三月彭水賢侯蔡佛田先生捧檄來權灌邑篆甫下車課士勸

農減徭平訟吏畏民懷頌聲大起適以歲凶米價翔踊侯相度輿情不阻糶不抑價惟以編保甲禁攘奪爲務詳請開倉平糶胥吏毫無侵染而又捐廉爲倡勸諭各鄉富民就近村落減價接濟婦孺提携不驚不擾僉曰災黎更生如天之福然而侯戴星出入忘寢忘殫已心力交瘁矣今夫父母之於子也維持調護無不欲其飽煖而恐其饑寒一至年荒穀貴力難兼顧亦付之無可如何耳侯以父母斯民之責盡父母斯民之心與嗷嗷待哺之獨其父母所不能生全者侯以一人生全之苟非仁心爲質又兼幹濟之才安能鞠人謀人如此哉古稱召父杜母何以加茲滋邨人也灌邨接壤耳食口碑久矣頃賢侯有量移之信灌民惘惘如有所失思築亭誌德囑滋贅序滋維灌民不忍舍侯去亦知侯更不忍舍灌民去乎灌民不能留侯去亦知侯有遺留於灌民者乎小試救荒猶其偶也平時教孝教弟教慈教讓語重心長凡

灌志文徵

卷五 雜記

三十一

所爲冀灌民之返樸還淳以安本業以保身家者果能互相勸勉無忘侯化民成俗之至意侯心慰矣是卽所以報之今歲大有秋農田疊報同穎適亭成顏之曰嘉禾咸以爲侯之德政感召自今以始歲其有皆侯之賜云

重建襄護王寢殿記

丁寶楨

會稽禹廟梅木爲梁久之化龍時時能興雲雨鱗鬣皆飛動邦人異之王故秦守踐禹之迹鑿離堆醜雙江鏤崖誓水刻犀鎮泆其子二郎克篤前烈後世利賴竝爵爲王光緒二年丙子冬奉命督川越明年丁丑季春之月視事官廨詢猷黃髮咨所疾苦維江流失修故道淤塞水不灌田厥害滋甚遂乃躬履灌口閱視所謂都江堰者與前觀察使丁君士彬商榷窾要召工興作節宣以時民無旱潦涸復農田計將千頃爰據情入奏推求神貺天子嘉焉晉封今號每至官司肅拜重門洞開簫管備舉賓僚陪位雷車風馬翕合若

接都人士女奔走偕來瞻拜殿庭歡欣舞蹈然而楹柱朽蠹墻垣傾圯丹青石堊漫漶泯沒非所以儲精翹誠昭格上祇也今觀察使王君祖源復開濬白馬漕明效大著願爲靈佑思答洪庥哨臺之陽適獲文木程以尺度天然梁製非夫功德在民捍災禦患烏能珍材潛感合契神禹乎前志載王治水時與江神鬪其詞近誕然驅厲衛民威武不懾求之正史蓋亦多有王經啟水道澤被梁益地大物博雄擅天府微特白公鄭國眇瑣無足稱誦卽循吏若孫叔敖決芍陂灌雩婁汝南鴻郤河陰萇蕩衡論形勢殆難方軌宜乎父子血食茲土錫慶蕃釐長與岷江奠麗終古也王君旣成寢殿碑並請寶楨爲之記云

復造白沙繩橋記

丁寶楨

惟茲白沙據縣之右谿源雪嶺路值松茂夏雪秋霖橫流於道箭迅飈下漂

灌志文徵

卷五 雜記

三十一

疾洶湧舟楫弗利甚或阻絕光緒五年余奉命簡閱西鎮騎從道此擊楫奔流顧歎駭湍卽便求隱詢於土著知在前明舊有繩橋乃毀於水兵燹因仍難卽恢復今僅兩岸圮址天生磐石隱約中流耳乾隆中邑民周尙仁捐設義渡以濟往來每當貢使絡繹鹽茶載道星月卽須暴漲滯礙渡尋弛廢行旅咨嗟爲日久矣用是嘉慕繩橋之安便慨念此道之艱虞思復綏濟解茲危殆乙酉仲春再巡觀江水之安瀾喜墉堰之順軌乃使權水利莊裕筠審地勢規舊基亟時興作名以利涉於是鳩工飭材壘址於淵結繩爲梁長五十三丈因石層砌翼亭於上高二丈七尺添建石墩高亦如之岸側澆水衛以石隄東西仍列屋舍長虹空起上峙岷江凡鐵石竹木工用糜金三千七百兩余與權按察崧君蕃龍茂兵備道王君祖源成都守黃君毓恩署夔州守慶善捐廉任之費不出民工不勞役舍舟而徒化險爲夷人無病涉去就

安穩萬里艾康民莫不利余惟持節西川九載於茲去民疾苦惟日不及政通人和百廢俱興或未逮焉竊念繩橋頽復行李過利在公職司盡任勤苦灌之民又能體上急公爲下好義共樂捐千二百金並周氏義渡田畝爲歲修計成功可久惠及行人寧有既乎經始於四月告成於六月爰偕兵備臨江釃酒合樂燕飲而落之執事耆老揚解請曰昔在漢時析里頌李翁之功閣道紀陳君之美拯危蠲難長息勞費事無大小安民則惠今行旅蒙賜罔道極通柔遠施及荒徼不有記述焉期久遠因可所請備記刻石樹於岸左以示後賢光緒十一年六月二十四日記

襄護王寢殿落成記

丁士彬

光緒癸未夏士彬再權成綿道篆季秋偕大府勘堰瞻謁神宇見寢殿楹柱蠹朽就圯道人賈教政素能祀神者也至是以重建爲請士彬白之大府遂

灌志文徵

卷五 雜記

三十三

率寅僚各出貲財屬道人肩厥事鳩工庇材適大木自峭臺涌出長短恰合梁製期歲而工竣爰於春仲復隨大府往視巍峨伉爽頓軼舊觀道人之精心果力實有足多者祀畢水利分守莊君裕筠屬士彬爲之記殷殷敦促彬則謂神之功巍矣煥矣志籍所在或實或誕民所視聽即天所視聽此無待於記也都江堰事歷數朝或舉或廢往者弗具論自咸同以後修廢若何利害若何未必人人能識之未嘗不人人樂道之亦無待於記也丙子之冬士彬初攝成綿究心水利次年制府丁公來蜀盡然修復以採於衆論者下詢及彬彬既親見全堰之敝陋民田衝刷以萬千計良不忍以工繁費鉅違心諫阻大府特檄陸君葆德權縣事勸工役士彬例往督察次年工畢遭異漲人字堤復決讒議間興輒使勘視彬因坐此失職惟當初本無見功之心臨變忍有歸過之意且仍恪遵先奉補修完固之旨與莊君及劉君廷恕盛君

時彥勤懇時事昨獲深淘今求低作諸君尤不以事機中變稍間初終全功穩固迄今七閱汎漲規制未更衣冠摺紳或不盡悉而蚩氓利賴心口畫一繫維神之靈爽實鑒觀焉又無待於今之記也比歲以來田畝涸復各堰安流豐稔屢告國之福也神之惠也十四邑農夫之慶也而微大府之堅定暨崇公扶三王公蓮堂之經營與在事諸君迭相更代駕輕就熟之力不及此於彬無與彬固無庸僭記也即今日廟貌重興文木高拱遠近舛蠻莫不託美而神之奠安妥侑愈覺恍兮若接千載一時之盛制府與王公蓮堂碑誌詳言之彬何記爲莊君曰事有由始功有由終人世離合變遷瞬息卽爲陳迹而江都之役廟寢之工先後九年間若隱與在事諸人有相爲終始者殆非偶然終不可以不記兼慮無以答賈道人之城也彬不獲固辭頓忘身陋爰述之時乙酉六月望日也

灌志文徵

卷五 雜記

三十四

都江堰靈異記

光緒七年

周盛典

益州古稱天府所恃者水利耳然自秦迄今越二千餘年其法不做賴後人補救之力居多今上御極之三年平遠宮保丁公持節督蜀慨然念河流之變遷堰工之失修民田之未復也謂於朝發巨帑檄監司丁公遴牧令中之熟於水利者往治之閱三年而功始竟前郡丞盛君今郡丞莊君尤能實心任事仰體公意先後請開白馬漕長一百一十丈寬八丈有奇俾內江水足之後餘水盡注外江比年來晏然順軌雖盛夏太溜不致爲患尤異者堰魚嘴前新安馬叉表長一百二十洞其制以檉柳雜木爲之每歲放閘後逐次撤去僅留數洞以殺上流水勢然遇盛漲亦卽隨波漂沒今則巍然峙立者尙有五洞於驚濤惡浪之中發生枝葉鬱勃菁蔥斧斤之痕宛然尙在豈非公之精誠所結感通於天以召此靈異與公之大修都江堰也凡七至其地

往復履勘孳孳不倦民田賴以涸復者甚多深仁厚澤入人心者深矣異日當以此爲召伯之甘棠武公之棗竹焉典灌人也目擊其事爰爲之記且系以頌曰天施地生兮絲絲不絕惟誠感召兮如操圭臬昔遭陽侯兮隄崩口決我公奉命兮精誠虔結爲民捍患兮風馳電掣安流順軌兮支分派別瑞木呈祥兮朋生萌孽斧斤未戕兮波濤不齧似田荆兮枯枝復發類文梓兮繁柯鬱勃和氣翔洽兮人心豫悅祝千秋世萬兮與通佑顯英而比烈

馬祖寺源流記

彭洵

馬祖寺者大寂禪師之道場也師名道一漢州什方縣人俗姓馬氏故稱馬祖又稱馬大師生有異相虎視牛行引舌過鼻幼薙髮於本邑羅漢寺受具於渝州圓律法師開元中習定南嶽遇讓和尚發明宗旨同參六人惟師獨授心印復還什築台說法人謂之如來再生會爲鄰媪所嗤遂棄去之江西

灌志文徵

卷五 雜記

三十五

建陽居佛嶺旋遷臨川復移南康龔公山山多魑魅人不敢居師至毒螫猛鷲盡馴伏大歷間連帥路嗣恭請師開法學者如雲日偕百丈南泉及龐居士等解說禪理機鋒四出了達無礙與石頭和尚同爲六祖第二世法嗣貞元四年二月初一日示寂於石門山元和中謚大寂禪師寺乃師之道場非入滅處也舊志謂有師靈骨塔誤矣厥後玄風闐寂繼起無聞宋初澄遠禪師復具慧根爲如來種子其姓氏遠不可考指月錄云師依雲門初爲侍者門每接師呼遠侍者師輒諾凡十八年忽有悟門曰我今更不呼汝矣一日將辭去門曰光含萬象作麼生道師未即答門令更留住三年參悟益精六通四闢妙解靈機不可思議遠近皆稱遠上座將示寂辭知府宋公璿曰老僧行脚去通判曰風狂僧八十歲行脚那裏宋公曰大善知識去住自由歸謂衆曰老僧四十年方打成一片言訖而逝寺今有塔蓋二師者皆一代聖

僧具菩薩行所以垂光茲寺者也元明以來象教凌夷罕生法器崇禎之末復遭獻禍禪宇焚蕩惟金剛殿獨脚坊孑然獨存國朝順治十年繼虛燈靜公大禪師斬棘披荆重振法古其弟子醉月曉公得傳衣鉢再續禪燈曉公俗家臨邛初師海印法師聞靜公高行遠道來參篤志法門精勤執事垂十五載康熙十年邑侯馬公璣爲大護法首布黃金購諸佛殿肖像瞻禮經樓齋厨僧寮客舍具備遂開期會說法度人晚得照識法師號雪平者付以大事乃閉關絕粒不問人事俄吳逆不靖蜀淪於賊曉公亦坐脫雪平重參丈雪大師於昭覺寺歸主寺席丈雪道行素著延陵所皈依也雪平爲之法子宰灌者咸善視之故得大啟榷榷宏演法教并購南藏釋典六大樹以資講誦一時稱盛馬祖遠公之風遂復振乾隆間欲仁大師博通儒釋結社談經不異東林盛事所著語錄人爭傳誦嘉慶間寺事不治香積時空慧根法師

灌志文徵

卷五 雜記

三十六

復出振之賴以重興光緒初元經樓丈室不戒於火藏典亦半灰燼靜峰上人經營補葺今復舊觀矣按馬祖寺亦名承天寺其始失考而馬祖之名實自道一禪師得迎聖橋碑云灌陽有馬祖承天寺是馬祖承天嘗並稱承天又似馬祖所建也又指月錄云青城香林院澄遠師禪涪翁方廣院求化疏亦稱香林遠公殆唐爲承天宋稱香林元明以來或稱馬祖或稱承天國朝始專稱馬祖歟寺有含雪樓拜月台今廢惟八角井存寺西有伏虎林東有降龍橋東南有迎聖橋今亦無而迎聖橋者傳爲玄宗幸寺寺僧祇候處亦云王蜀後主幸青城嘗經此故名寺有產千餘畝醉月所插業也歲二月來遊主席界上人深懼數典之忘請記顛末嗚呼美矣夫衣冠而學者必曰孔聖而孔聖之言曰善繼善述又曰敬尊愛親其行甚庸非有斷臂截指之難也而士之不忘本始常少上人以浮屠氏追尋墜緒急急不遑非所謂墨名

而儒行耶誠能充斯志也遠守馬祖遠公近循燄虛燈醉月曉諸公之遺習
禪悟道轉大法輪將選佛之場近在是矣余乃嘉其志爲之道其大略如此

千金堤記

彭洵

導江始神禹而無堰秦守李公鑿山穿江千里沃野六字垂經蜀堰始特聞
漢唐因之宋稍壞遞元益以鐵龜石門明增鑄牛與柱皆倣李法留意離堆
我朝仍舊歲修都江名大著而堰遂益重堰固東面崇岡西背沙渚中廣不
逾百步江水迤邐而下必三折乃東每西徼雪消洪流噴激電疾雷轟江上
諸峯蹴土欲動堤間舊設三閘以殺水勢恆泛溢不能容丙寅夏江內外災
閘左口決奔濤迸下經數里始匯諸江居民田廬坵墓蕩析綦多邑侯備上
諸大府觀察鍾公仲山以今司馬曾公賢言於當事檄公至既至之明年例
修左堰咸較前有加巡視離堆慮患不可已作新堤山趾以當閘口寬廣綿

灌志文徵

卷五 雜記

三十七

互若小山側出江際水至一折而西堤脊作亭三楹以瞰江流消長刻犀其
左右表以柱堪曰千金亭曰望澤柱曰廻瀾大都仍李公遺制而參伍之耳
工既訖召洵誌願未辭不獲嗟夫有官守者貴得其職公主水衡勤民事以
捍患禦災爲念弗計升斗其不忍狂瀾之倒而有障水之慮乎真令吾鄉之
父老子弟慨江河日下而思砥柱之功乎後之言水政者將有所則矣是烏
容不記

普照寺源流記

光緒三十二年

高屢和

余嘗登青城三十六峰遍覽一百八十景鹿頂之前鶴峰之右循味江而東
岡重陵複囷困盤盤包含元化爲普照禪林在焉寺歷數朝世有傳人明末
火於獻國初開士某創數椽僅安榻逮雍正七年有天全玄天觀僧梅菴徒
心蓮由昭覺來此挂錫見寺左有先朝故僧碑塔知爲古刹規度初就嗣因

業少差繁出遊廣漢報恩寺經寺鄰迎歸將寺業價券交理自行耕食其九世祖心蓮之所以始基青城如此十世傳真十一世海汶均能守成十二世印廣印宗與廣徒正文勤苦積累協力經營法堂香殿精舍齋寮以及寶塔金碧木石工造次第修飭並置田六百畝餘山種數石屬菴二煥然灌南一大叢林已爲縑流中承先啟後有志竟成者及十三世正文正獻更廣大佛門請旨傳戒時城南先大夫乞養家居爲祈邑侯朱玉成其事於是懸桂鍾板普濟十方敲醒迷人同歸善果傳十四世靈峰又置屬菴二水田二百餘畝咸豐初方擬重修樓殿易木以石忽後山電掣雷轟天驚石破遂鳩工劈柱作久遠計越四年工始成迄咸末同初靈峯示寂崇峰繼任中間藍逆竄蜀西焚崇陽屬寺景德由大寺採料修復既費數千金又培修寺內殿宇石級並廣福平信兩院堂殿亦費數千金累債萬餘付還七八皆崇峰力也且

灌志文徵

卷五 雜記

二十八

夫寺廟之盛無過漢唐然明帝太宗胥重佛教賜絹賜錢動以萬計其工雖巨猶易爲力若茲不假捐施成大觀宏大願非苦行僧不能非智慧僧亦不能昔裴休題端甫和尚云在家則張仁義以輔天子出家則運慈悲以濟衆普照諸名僧之化無爲爲有爲意在斯乎意在斯乎說者謂層樓疊閣非徒以壯觀瞻法鼓金鐘非徒以悅聽聞必將有以參最上之乘證如來之果歟憶光緒辛巳春余隨黃觀察翔雲先生來遊僧舍翹觀形勝先生歎美曰斯寺之枕斯山也自上清右嶺縈紆而下列嶂層巒別開堂奧後束峭壁前排斷崖古槐一株長撐老幹紫柏雙樹各抱冬心當此春明湖水琮瑤煙花象外已覺萬緣皆空歷階而上殿閣崔巍仰視川督寶公明心見性額蜀州楊海梁撫軍題柱句城南先生大書傳燈聯不禁憬然發我新悟余曰先生曷不留題先生色然喜遂屬上人果秀出紙乞詩書有疑是古桃源艷冶花千

樹等句乞聯書有果證菩提普徧無漏秀依春水照見皆空句其卽斯寺斯山與斯僧之妙諦歟談禪林者其知之否今秀上人圓寂已久其徒洪鼎繼登選佛場出伊列祖源流數紙屬題序文以光祖德及序成鼎僧飛錫含月又肩常住始索序勒石余竊歎繼緒有人前美益彰是以卽登覽之餘臚列始末禪宗臨濟宗派以爲寺僧探源識流互相勸勉後之來此著袈裟者當亦興起於斯文

重建上清宮記

高履和

青城三十六峰而高臺居第一上有麻姑池鴛鴦升不溢不渴輿地紀勝曰天池禱雨輒應晉人始建上清宮於此咸同間予登臨覽勝殿宇蕭條尋宋陸游所詠樓閣參差者僅得於老霄頂古樹叢中覓右級石台而已光緒辛巳春廉訪黃祥人先生陟最高峰笑問山名予曰是宮也岷江東去雪嶺西

灌志文徵

卷五 雜記

三十九

來大面左環丈人右拱朝觀日出夜待鶴歸會心不遠極目無窮先曰此蜀西壯觀也梅疇昔首郡祈雨未徼福於山靈誰歟重新此宮者予曰微道士楊松如之力不及此然松如重建三宮費約萬緡不假募捐惟資餘積而上清先告成者豈非霖雨蒼生之至意耶彼長生建福兩宮先生已書其事此尤松如之以道心濟世彰千百年前晉宋之勝蹟非淺見黃冠所識也是又不可以無記

古白廟子記

郭維藩

廟所以棲神也而係之以白誰白之余先人白之也先是自某公由某所遷於是爲附近之無以肅觀瞻而隆祀享也於是建川主地主之廟於山麓其制樸而不華無雕樑畫棟之觀僅墜而爲白此廟之所由以白建也其人質而不文無附會鈎奇之說僅名之曰白此廟之所由以白稱也自族人凌夷

廟亦旋圮今錯居不一姓而興廢舉墜衆有同心爰復其故而稍加潤飾然緬懷先德則已古矣余不忍忘先人之舊與衆新之而復古之衆亦不忍忘余先人之舊因余古之而亦古之然則廟而係之曰白從俗也亦紀實也白廟而係之曰古仍舊也兼述事也後有繼者慎無妄事於更張

八角廟記

馬福臣

予先世巡按公自元代宦遊滯蜀子孫於明世卜居灌縣之青雲沱逮清定鼎蜀當大亂後土曠人稀官府招墾舉族乃東徙金馬鄉卽今予宅四周縱橫五六里間皆馬氏田也距宅百步有梓潼宮據形家言宜作八角式土人因呼爲八角廟其後族姓遷移地屢易主廟已陵替改祀土神而八角廟之名猶在先大父嘗欲規舊制訖未果同治丁卯予自秦中歸偶與族鄰父老談及往事欲重新之僉曰善乃於戊辰九月經始相與協力舉二百年廢墜

灌志文徵

卷五 雜記

四十

之迹興於一旦從此春祈秋賽永獲有年其裨益桑梓豈少哉爰綴數語用誌顛末亦以見事在人爲此其小焉者耳

禪師巖記 同治二年七月十四日

陳炳魁

禪師巖者因了空鑑隨而名也二僧參禪白雲洞明澈心性慧諸忠義獻賊屠灌時泰安寺住持僧集衆告曰賊至矣寺內數百僧方隅數千戶非二僧莫保也乃延爲主席咸聽區畫二僧扼山口築壘以禦賊攻之不能入陰覓間道燬寺戕僧及居民二僧聞警急率衆奔山後奮力擊賊者七今七陣溝其戰處也因衆寡不敵撫膺大痛曰負我和尙託矣遂觸巖死嗚呼扼賊山口智也擊賊山後勇也恥負所託而死忠且義也設二僧者不溷跡於空門而宣力皇路不受託夫山寺而擢鎮蜀疆吾知其能拒賊殺賊必不容賊之入蜀而屠也且並力擊賊同戰同死較楊展之以傾陷死于飛之以輕率死

尤爲轟轟烈烈幾與唐之張許媲美焉予嘗稽考遺文搜覽殘碣竊爲二僧悲其失傳然營壘故地歷今二百餘年矣而山岷野叟樵夫牧童猶相以禪師呼之則二僧忠義之大節不永輝耀并絡哉後之遊息於斯者亦可觀感而興矣

灌縣西路記

陳炳魁

出縣治西門經玉疊關過崇德祠左渡繩橋沿江直上十里曰水西關古設關遺址也唐宋間依山傍水疊石築之爲西路第一隘口國朝平定兩金塘遞自此始又十里曰沙金壩沙中有色燦若鈇金又十里曰猴子坡峰形蹲如猴下衍平疇百餘畝四圍山水環之南越里許爲青雲營因青雲沱而名也東岸龍溪入江又十里曰麻溪昔有市聚汜於水矣沿路石榴成林稻田可三四頃循隴登坪曰望江臺隔江觀坂山爲劉後主觀前水蜀王建茅亭

灌志文徵

卷五 雜記

四十一

處秀爽競獻臺前而大江自北南下曲折關鎖之狀可歷歷眺覽之山半一石竇麻溪水源也水寒而冽歲旱轟蠲之大雨卽挾風雷而注又十里峭壁三折挿江鳥道上懸崖腹下深數百丈波濤激如奔雷名曰三險司馬強萼圃鑿石作柱貫木爲欄較昔頗稱坦途又十里曰漩口場居民數百戶下爲粉灘坪汎署在焉大江南迤場下小河自西入之鎮以廻瀾塔處士姚清蘭所建也渡繩橋數百步兩山夾水石壁千仞李冰謂爲天彭門李膺謂爲天彭關者卽此峽也峽口側立一石大四十圍高十餘丈頂如覆盆亦名天彭石峽西白雲頂雲氣時插霄漢層壘白如玉臺下有神仙洞倒生石筍深邃不可測崖腰路鑿一綫懸絕更甚三險名曰虛閣其上倒垂鮮花附萼相銜環綴樹半立夏時紅爛如錦花之疏密向背卜歲豐歉恆驗又餘福道三字古題崖壁者也後人倣而刊之峽東汶山白崖爲汶之南界崖含粉玉色且

留斧鑿孔唐人依山架木運餉之棧道也崖背斜障江流長三十餘里故三
險置塘曰崖後白虛閣右行五里曰古溪塲居民數十戶溪水發源隰坂山
一名盤龍山南入大江沿江迤上十里曰勝因寺宋之勝因院也地名柘坪
見熙寧二年文與可記峯巒圍拱中開大陸其境最爲幽曠折左數百武曰
滋茂池興雲降雨滋茂百穀古之禱雨處也池前有銀杏一本八株大各合
抱柯葉盤空森陰相傳宋僧惟簡所植呼爲八仙樹又十里曰白花灘湍激
成花色燦如銀又十里曰大壩漩潭深數十丈有紅魚隱見大如牛羣魚隨
之故古溪一帶曰滋茂鄉又曰伏龍鄉壩上羅漢崖崖極險峻常見金羅漢
其地產赤金又五里曰魚子溪溪水入江處名酸棗沱有酸棗二株圍各丈
餘枝幹如龍挐虎攫沱面橫一繩橋灌北與汶南界也曰兩邑名橋爲入松
茂小道渡小河繩橋折左走十里許河心一大石面微凹魚躍之如舞雪曰

灌志文徵

卷五 雜記

四十二

魚躍石又半里有石出水五六尺大二丈狀如蓮花花瓣天然玲瓏又六里
曰官山坪乾隆間征西之師築坪爲糧臺又十五里過獠澤關漢諸葛武侯
遷獠處也唐大中七年吳行魯奉使巡邊有行見獠澤水石記重岡複嶺豁
然開朗田疇數千畝苦別有一天地三江口之水自西東下曰水磨溝兩山
夾水曰澗一山中斷曰壑溝爲田間水道山水名溝方言也依山傍水成一
大聚曰興仁塲塲內建興仁書院橫舍數十間塲外寨子坪高越百丈三方
壁立路通一面古曲尺寨也今爲汛署每歲春秋丁祭日汛弁冠裳赴書院
率紳耆生徒修釋菜禮家弦戶誦人文遂以蔚起南過繩橋曰老人村村落
翁媪耄耄期頤者指不勝屈風景宛如古昔地氣使然歟抑金酋勘靖以來
民久不見兵革國家之德澤涵煦者深也西走十里曰土門子又十里曰鷓
子山山有大酸棗樹圍一丈二尺高八九丈華夷以之表界明季慶符王借

師董卜韓胡此其捷徑也今則懋功五屯之大道矣

貞女坊記

陳炳魁

貞女楊氏者太學生清遠公女也幼字陳道乾年十二舅歿次年婿夭女泣告母曰兒舅無子矣忍聽其餒而乎且有姑在不往侍之兒何生爲遂衰麻如陳事孀姑能博其歡而朝夕尤拳拳宗祀適孀母有身陰具襁褓俟之及誕男也甫三朝卽抱歸凡便溺盥濯悉躬任之立爲姑後名道孔先達某義其事字之曰全三年稍長課以讀偶怠跪諸庭不謂起不敢起憚之如嚴師女年二十七猶未笄也姑爲卜吉成婦禮謁夫墓一痛幾絕見者皆泣下姑嘗病篤夜剖左臂取水滌之井通明如晝清澈見底天地皆金碧色嫗嫗驚視之遙見雙燭導以歸和羹進姑立愈時道光己丑年十二月二十日也越十年姑卒喪葬如禮全三娶胡氏有子女撫其長爲己嗣命名開祚嗚呼舅

灌志文徵

卷五 雜記

四十二

姑與夫血食幾斬矣女爲繼之洵義以全三也而矢志五十餘載勵貞操敦孝行尤巾幗完人哉道光庚戌聞於朝旌表建坊用以風世

游青城山記

衛道凝

自灌縣出南門渡沱江迤而南復渡岷江二十餘里乃西折傍山行數里至青城谷口盤折而入數百步抵長生觀卽李雄國師范長生隱居處也觀已毀惟石礎如箕行列尙可數觀西山中有石筍一高十餘丈秀削天成再上乃陟山岡谷口至此已盡又數十步有林木木多化校化疑作滑皮理皆橫可以飾弓有油堪爲炬林中多異鳥飛鳴山迴路轉突出斷崖架木棧以達爲遇仙橋橋以上巖壑益秀古木蕭森盤錯屈曲里餘至常道觀道士迎入獻胡桃松子茶及香稻飯已而引觀鹿圈鹿大如駒高足短尾色灰黑角長于身有力能抵觸前太守王公啟焜所放置者也殿後玉皇樓屋角有水清

澈甘美外甃以石時溢時涸名曰六時水其上三峰遞聳如梯頂如笠殿倚爲壁壁踰十丈有洞中奉天師張陵像多石刻由左麓緣棧以上右谷中多果木松鼠每棲食之林外有巨石二高各數丈朋比僵立相傳天師逐鬼至此引石壓之其荒誕若是明日道人復引遊上清宮宮據山絕頂路經擲筆槽道書云天師以筆擲鬼山遂裂其草與石皆有黑痕此南槽也北槽者前峰與中峰相比處谷深可千仞而路在山腰一線凹入振軒駭曰此可過耶予好奇道人亦固以爲可曲躬先往但聞崖石與衣相磨擦格格有聲曰勿懼也予熟視不敢前道人乃反復遊前峰攀藤附葛約里餘問行幾何矣曰五之一耳振軒難之因與予姪反期於山口予獨與胡公父子進至朝陽洞日已哺矣問上清宮遠近道人指白雲深處曰此去不過十里但路險耳問何似曰擲筆槽猶可佇足所懼者目眩心悸而已今上清宮有側路數丈路

灌志文徵

卷五 雜記

四十四

皆石上無寸草之援下有無底之谷足一失勢鮮有幸者問宮所自始李雄爲范長生所建也內有麻姑池冬夏不涸鴛鴦井汲彼此動斯可得而言者若夫諸峰環拱氣象萬千挹秀探奇在人自取而非道人之所能繙縷者也胡公曰旣不能至而留連何益振軒待子久矣乃反至山口道人以玉皇樓記屬予而別時乾隆五十七年十一月十五日也同遊者胡公名應選中江人丁酉副貢振軒李君名映演簡州諸生胡公子俊予姪汝良

天師洞玉皇樓記

衛道凝

壬子之冬十月三日予遊青城時常道觀住持萬本圓方修玉皇樓屬予爲文以記之按道書漢順帝時張道陵嘗于此置琉璃高座誅滅鬼衆稱第五洞天後以功成飛昇故建此觀而玉皇樓則始于康熙八年欽差塞爾圖等所建令其再造也夫聖人之道在治人而天師則言治鬼儒者存心養性所

以事天而方士則設清淨道場以供奉玉皇考之天象紫微垣中常座天乙是也其在太微垣者爲聽政座天市垣者爲畿內座大角爲正月新政座大火爲天根子提座上帝之神無定位是以御無常居神無往而不在故象無往而不著非可以形求也雖然古聖人嘗以神道設教矣自三苗昏虐九黎亂德民興桀泯多求之渺茫冥昧而天地人神之典往往雜糅瀆亂弗信詛盟此妖誕之所以日興而人心之所以不正也甫刑曰乃命重黎絕地天通岡有降格羣后之逮在下明明棐常鰥寡無蓋則天師之降魔役鬼而屏諸遠方者非妄也易曰仰以觀于天文俯以察于地理是故知幽明之故原始要終故知死生之說精氣爲物遊魂爲變是故知鬼神之情狀則玉皇樓之棟宇閎崇而肖像尸祝者亦宜也非妄且宜則觀之廢而興毀而修者不正賴有人在乎本圓神清氣爽其振作之功應與十方信善並著故因其請而

灌志文徵

卷五 雜記

四十五

書之勒石以記歲月

培修泉水寺記

佚名

灌東二十里有泉水寺距佛座數步方池泉湧涓流成溪自春徂冬澄清澈底寺以泉名宜也其創建失考清康熙初有僧宗琳祝髮於邑之石山寺偶遊至此覩其荒廢僅存曠地十畝乃募修佛殿積金購田若干畝益拓殿宇新廊廡佛像莊嚴誠淨土矣僧于乾隆十八年示寂塔瘞寺右夫善作者必善成善始者必善終世無堅物歷久必廢在得人以繼之再傳有僧如相者于嘉慶間增置田五十畝復修垣牆甃池沼繕亭閣其徒性美性善共襄厥成於以知創業之不易後之人幸勿隕墜也爰撮其始末而記之

劉母節孝坊記

楊澍

節母鍾氏宿儒連才女年十七歸於劉爲應春公室端靜和惠孝事舅姑越

十載夫歿遺子僅三歲卽國學生玉鼎也劉族雖繁門戶各別舉凡國課征徭農桑嫁娶度支出入母皆躬自區畫嘗泣曰未亡人守此一塊肉苟非嚴以濟慈孺子其能成立哉乃厚幣延師爲光大門戶計每值歲荒族鄰待舉火者數十家多隱德焉鄉人敬之公請建坊如例索記於予竊維忠孝節義與天地參發幽光卽所以扶正氣也宜勒貞珉用誌不朽

導江廢縣記

徐 昱

導江唐縣也宋末元兵三破成都縣被兵尤酷遂廢余友楊君甫永世居其間田廬踞廢城之半爲言城郭不盡可尋惟牆根往往而在銀杏大可蔽畝中空如屋誠唐植也土地肥沃耕鋤每遇甄礎蓋世變滄桑七百年於此矣予家其北數里時或過之丁卯正月旣望楊君招飲於家戶北向前有導江塘宅西南枕走馬河爲昔導江橋遺址地高兀杉柏蔚然青葱南望楊妃池

灌 志 文 徵

卷五 雜記

四十六

迎祥寺盈盈隔水寺爲唐代名勝有吳彩鸞手書佛經及蘇子瞻碑陸放翁楊升庵刻有題詠年久而毀今非昔比矣銀杏半爲野火所焚枝葉蕃茂樵牧相戒不敢翦伐巍然獨存導江舊多名人仕宦意皆彼遊眺之區蔓草荒煙無復可觀嗟夫人生不過百年古今遙遙弗能相見徒於變遷之後推想當年盛概而山高水深空閱人事所賢豪所太息而無如何者也雖然廢興多矣予嘗詣長安觀秦漢故都油油禾黍更歷夏殷之郊祇此村居田隴何有於區區一導江哉守尺寸而忘達觀可憫也王右軍蘭亭序云後之覽者亦將有感於斯文質之楊君以爲何如

易節母韓氏建坊記

徐 昱

乾坤之所以維持不敝日月之所以迭運不息河山之所以鎮定不移者非恃有此綱常倫紀振興奮發於其間哉灌縣武生易存敬善騎射試不售賣

志以沒遺二子在襁褓妻韓氏撫子成立俱受室有孫曰某其志勤劬所以報存敬者至矣無何子逝孫殤說者謂孺人苦節能博堂上歡又延師教子學業日進婦道無忝而罹此凶憫天之報施善人何如哉當是時族黨以孺人慘戚咸爲之慮孺人乃有遠謀撫伯氏孫某承祧家計益隆然則孺人以延存敬之祀於既墜者不難於前而難於後不難於始而難於終非尋常巾幗中所及也光緒十二年有司以闡旌表如例坊成於二十二年秋時孺人年八十精爽不衰安可謂天之無意於孺人也因誌其概以俟異日之採風者易氏爲邑著姓居邑東十里桂花林

三詣青城記

徐昱

昔人謂上清之遊極天下鉅觀余嘗三詣青城俱未登上清殊歉然也光緒二十一年及門梁竹帆明經與余爲青城之約五月癸巳出灌治東門過鎖

灌志文徵

卷五 雜記

四十七

龍橋涉新渡口詣梁生宿梁生家距山四里甲午入山五里至牌坊岡古名龍居山石磴盤旋賈勇而登由岡西進途皆平坦樹林陰翳山鳥和鳴福地洞天不覺塵心頓淨然崖壁多斧鑿痕唐以前人所闢也五里至集仙橋左折而上卽古常道觀俗稱天師洞觀內軒皇台蓋皇帝訪寤封真人處也左有三島石又名降魔石石高數丈劃然三分云是張道陵降魔所劈台南懸崖千仞名擲筆槽林木森蔚葉有墨痕云是道陵遺跡銀杏樹大可十人圍精氣瀆湧鍾乳下垂真靈物也最後懸崖上插木駕屋以祀道陵唐玄宗鑿勅存焉書法圓潤流道士寶之宋元以來名人刻石無一存者明末之亂蜀中文獻無遺此其一端也道書載青城爲神仙都會漢唐以來黃冠居此而獲冲舉者往往不絕自古達官貴人名流逸士以至庸愚婦孺或來自千百里無不豔稱青城而廟宇之興則今不如昔志載青城一百八景唐宋時

自長生宮入山抵上清宮十餘里間庵堂不下數十所今僅存一建福宮其他皆基址荒涼廢爲禾黍令人有滄桑之感焉余宿觀中兩夜道士尊禮有加乙未導余從觀後循岩而上古有偏橋今鑿石開道約三里許左爲祖師殿從右而上爲朝陽洞崎嶇盤曲上出雲霄雖未及巔已有俯瞰諸峯之概朝陽洞爲室三楹傍岩而建黃翔雲觀察構屋於傍屢宿其中刻石爲記洞在神座後昔人謂通王屋者是也同行三人皆年少有膂力執燭而進余從之俯首行約三四百步或高或下昏黑不辨既覺岩上有水滴瀝懼妨燭火遂引而出三人者由洞而北以至上清余畏途險隨道士返觀中丙申出觀門由興路下牌坊岡左折過石笋堂有石高矗如筍堂已無存循山麓斜引而上澗水潺湲禾黍菁翠約三四里漸上陡坡岩上有唐人所刻青城山三字徑五六尺俗呼大字岩循岩至山頂是爲高臺山三十六峯歷歷在目天

灌志文徵

卷五 雜記

四十八

氣清朗可以西望雪山東攬錦城沃野千里中大江灤洄如帶上清之遊極天下鉅觀古人不我欺也由此入廟尙二里許路旁松杉掩映雖夏日炎天亦有森嚴氣象高可想矣路皆石板而破碎剝落當猶是唐時物廟爲楊松如道士建樓閣幽邃鴛鴦井麻姑池古跡猶存廟後林中石礎大盈五尺許蓋王蜀時起廟祀有唐諸帝及建像處年久而圯富貴何如草頭露信哉余三詣青城今日始登上清夙志克償不覺徘徊久之道士衛滌泉掖余下坡沿舊路肩輿出山是夜宿長生宮即漢赤城閣蜀後主錫名碧落觀范長生故居也長生有道術壽至二百歲李雄據蜀欲以位讓之不受封西山侯流民多歸之青城八百里賴以保全廟自明以來規模狹小同治初楊松如改建樓閣頓易舊觀殆有數存耶黃翔雲觀察爲撰記勒石其弟子盧靜虛余蘭舟皆循謹能守其教方興未艾也丙申梁生迎詣其家戊戌乃歸

青城山金華宮記

徐昱

歲在丙午立秋日甲申偕高君節庵出灌治西城過繩橋由玉堂場詣迴龍庵宿庵倚石定江而建道士傅立三頗加開拓幽靜可喜擬明日入山詣上皇觀相傳明皇幸蜀鑄真容於此故名然觀不自唐始也是夜大雨侵晨山霧瀾漫路險而滑不可行乃東下三十二里至普照庵爲邑南叢林樓閣宏廠規模恢闊山中清靜道場也僧升寅接禮有加居三日己丑始出山二十里至光嚴古寺寺爲悟空和尚創建悟空爲明太祖叔父先居西藏爲蕃僧所推服暮年來此僧徒甚多洪武中頒發藏經猶存僧世昌尤能振其緒業居三日滌除塵氛令人有世外想壬辰循原路至長生宮癸己入青城至昭慶觀五六月來遊人寢衆宿者百數山深反囂入秋雖減尙雜沓也已未由青城至上元宮石壁刻有黃翔雲觀察詩頗超逸高君便道回家予獨宿廟

灌志文徵

卷五 雜記

四十九

中次日丙申天朗無風入山行澗水迴環峯巒曲折樹陰繚繞使人意移約十里爲望坡巖文與可詩所謂澗水浸斷橋車馬不得通者也唐宋以來屢經剗鑿斧痕宛然過此有三溪橋古所稱三溪水者也越橋由左而上即白雲溪杜光庭宅墓在焉右上卽入大面山中路沿岩而進爲青皇觀中皇觀再上卽上皇觀又四五里爲八卦台下有神仙洞深遠不可窮究爲青城七十二洞之一八卦臺卽古壓月山晉置上皇觀一名玄真觀唐睿宗第八女玉真公主及金華公主悟道於此樓閣甲於山中稱盛一時統名曰金華宮元明時早就傾圮經獻火後荒廢無可考惟臺上石礎猶存大徑四尺餘皆公主遺蹟今之上皇觀乃雍正時道士李太浩創建門前古杉皆唐以前物至此則羣山環護如兒孫拱列形勝若昭慶觀而宏偉過之志載唐金華宮遺址與上皇觀相近咸豐時廟中掘地出飛龍鐵爐重約十斤識是公主故

物乃知今上皇觀卽金華宮故基而地勢壯闊猶見當日規模證以唐宋八福唐觀本竹觀仙居觀儲福觀諸詩知公王院宇開曠非若時流所棲之瑣瑣也卽今中皇觀青皇觀或亦當時之脚庵至山口之上元宮似爲侍從供億之所五代王衍猶偕其母詣金華宮拜謁公主眞容避暑其間此可見天師洞爲道流涵居而上皇觀高遠幽靜雅與主稱其擇地選勝出自朝廷無疑也唐季杜光庭入蜀居白雲溪清都觀距上皇觀亦二十里而遙其時去公主之沒已百餘年而光庭登臨懷古諸吟詠尙謂樓閣雲連冠絕此山宋陸游儲福觀詩云路轉屏風疊雲藏弟子家世無勾漏令誰此養丹砂宋季廟貌猶如故今則蔓草荒烟都無所見至墳墓亦不知其處富貴如帝王家尙如此區區一邱一壑何有哉苟非鐵爐古杉之遺留更無從見其大概矣廟入山二十餘里光緒初有匪徒誘脅道士據爲窟穴戊子己丑後道士李煥章攜其弟子唐復初由上元宮入居之匪始他去煥章欲重興古蹟未舉而逝唐復初爲人強毅有道力必能成其師志勝景當賴以永存矣戊戌出山至上元宮偕節庵回城

焦氏祠記

李芳

灌東南四十里有禪院曰焦家庵爲焦氏祠堂舊趾同治乙丑閏五月廿六日邑侯李篤之先生莅任過此語及之令僧寂鼎奉其遺主重鄉賢修庵祀也按焦氏爲邑巨族盛於前明載諸邑乘洪武中有以貢生起家任永豐訓導因蹇義薦擢主事歷官刑部員外郎焦公敏也其後有曾孫韶登城化進士授刑部主事遷武選司郎中知曲靖時有惠政境產嘉禾民咸頌之又其後有維章登嘉靖丙戌進士三典文衡兩司學憲皆有澡鑑之目而以大參政終夫以世德作求代生賢哲當此風微人往考其文章政事卓然不朽鄉

灌志文徵

卷五 雜記

五十

人稱之赫赫若前日事其殆杜子美所謂文采風流今尙存韓昌黎謂鄉先生歿而可祭於社者歟惟地之靈生人斯傑焦雖缺祀而奉於緇流賢雖不存而重於里黨亦可知讀書談道之士有足令後來興起景先型而勿替者不誠有禪於教哉

錢公隄記

李芳

吾灌西接松茂東達省垣有建瓴之勢爲江水所經江出岷山神禹所導秦旣併蜀郡守李冰始分水溉田蜀因以裕其上游曰都江堰屹峙江中幹流疏入南江最南有石牛堰黑石河所由始溉及崇慶新津堰係民工乾隆六年四川巡撫碩色奏歸官工部議未允同治六年錢公攝邑篆淫雨彌旬溢逾水則百川俱決而黑石河淹沒糧田二萬餘畝泛亦如之紳耆陳炳魁等慮復橫流請公爲防壅計公曰禦災捍患有司之責也於是親勘水道夜宿

灌志文徵

卷五 雜記

五十一

江干集士民商築隄躬親督役講明深淘低作之義自索橋西起袤一百四十餘丈高九尺寬一丈二尺更從迤南江口冲決處起斷續至下游蘇家橋共挖河二萬四百餘方用竹籠一千五百餘條添築護堤數百丈堤外植柳數百株藉資蟠固又勸崇慶州民於灌境分受江水之湯家灣築堤一百餘丈挖河二千餘方以暢其流是役也經始於同治丁卯冬落成於戊辰仲春不百日而堰歲事灼費二千餘金維時庶民子來踴躍輸將非公之勤勞所感哉堤從西岸一帶捍禦淺見者專以爲黑石河之工實則沙溝柏江兩河均蒙其蔭公又慮後日水災通稟立案彌補蓋力竭於一時而心存於千載矣夫蜀中治水者惟李王父子能繼禹績厥後元之吉當普明之夏埴胡光盧翊皆著有勞公今疏築殆可與前人頡頏然不自以爲功每語人曰此皆衆力我何與焉及公去任猶戀戀河工恐其泛溢迄今夏秋水漲澎湃不減

於昔年而水歸故道晏然無事以此卜其後之安瀾也公名璋字少松安徽懷寧縣人

遊趙公山記

古名青城山亦名大面山

李芳

趙公山者以隋趙昱名層巒疊嶂高插天半爲青城第一峯吾鄉晴雨悉課之素耳其靈異訪之而未果也同治四年七夕後六日客有邀余同遊者自螃蟹河湯家溝取道抵平石板瞥見白練飛空而下則滴水岩也路盤疊如踏雲梯上土地嶺過石佛菴已而夕陽在山霧迷谷鳥鳴林方訝止宿無所忽聞聲手招曰半山慶雲寺可下榻也隨步數里許果延宿如舊識者翼晨遊小西天照壁曰臥牛山水口曰王婆岩左有五星塔右曰八卦臺葱葱鬱鬱佳氣環撲眉睫間午入神仙洞牀凳屏枕皆石爲之燭行數百步一溪紺碧無底橫隔丈許對岸洞中微出明光且聞雞犬聲殆別一天地也可望不

灌志文徵

卷五 雜記

五十二

可卽悵然者久之外有狐女洞玄女洞牡丹坪未及畢遊而暮鼓寥寥矣又翼日七月之望也銅鈺朝挂赤霞萬道山頂爛如金銀攀崖躡壁約上二十餘里荆棘縱橫無步可入客乃奮然闢路隨闢隨升散花撲面鳴鳥迎人不覺躋絕頂焉岷山數百峯如屏如笏江流數百派如帶如池歷歷在指顧間爰占一絕曰青雲生足下赤日盪胸前猿鶴來相伴高高枕石眠余幾無下山想矣客曰峯下一坪喬松古柏蒼翠欲流瑤草琪花幽香遠噴意有神仙洞府乎牽蘿遞下見石礎如大磨形千百年遺跡也低徊留之不能去俄焉月圓如鏡斜挂峰前幾陣清風如迎如送余與客已足踵寺門矣詢僧僧喟然曰趙公之舊基也廟已久隱見此亦係仙緣且述公爲嘉州守入水斬蛟功不在李王下仙後常立馬峰頭故山甚靈異時方夜半月正當中金波潑地萬籟寂然忽聞鐘鼓之聲次第來半嶺余亦若驚若悟若夢若醒正襟危

坐不知東方之既白

培修上清宮序

清光緒初楊松如龔仰之二道士所締構

萬象春

天下名山勝地往往具足梵宇仙宮造化何心神靈有主是以抱一得一玉傳道德之經有名無名丹城啓覺悟之路莫非激揚煩陰棲妙果於香城揮發蓋纏握玄珠於淨域雖真元混沌陰陽爲破道之墟而素鍵潛融天地即降魔之境所以功懸日月業淨雲雷先臨妙物之津清發乘時之氣元房霧轉抗金樞於桂嶺之西紺殿星開列玉刹於海林之北此青城爲福地洞天而上清宮尤擅青城之勝也松如仰之二鍊師者負姿清粹履道堅貞應積善於高門契冥緣於風世果浮觴引潛圖彼岸之功聚鑿延沙即揆爲山之業靈樞密運闢仁路而長明慧及高揮斬邪關而洞照以爲冥機體化萬象皆空執數逐微六塵難淨於是清疏視聽澡雪神襟探妙趣於希夷範靈蹤

灌志文徵

卷五 雜記

五十三

於顯晦身持寶印口出神珠馴鳥性於智林息心猿於定木深雲西至潛消火宅之氛慧日東來迴廓昏衢之景用以振法海之波瀾挾仙機之闔奧乃從經典餘暇廟貌留心鳩工掄杞梓之材班匠獻鉤繩之巧瑀檐畫棋龍回紫漢之間複雷重巒鳳舉丹青之外迴廓窈窕自吐風飈列樹崢嶸坐含雲雨房軒市囁疑入不夜之城戶牖皆明似出重昏之鏡然未煩綺羅解珮並無冠蓋捐金但見蛟宮蜃窟暗呈白室之祥月面星毫坐照紅雲之氣巖花落沼近拂天衣澗葉低陰斜籠寶座山童獻果還接交露之臺眞女持香卽入飛花之閣玄場佛境與河岳而增新鶯樹雞林共風雲而改色從此瑤扉乍敞挂明月於金鋪繡栊長橫落繁星於玉砌自非理參幽贊道契玄微澄機意於紛紜置抱懷於寂寞安能丹青玄圃妙色常存銑蓋瑤龕神光不昧也哉

重修勝因院記

傅毓秀

灌西山中有古刹曰勝因院不詳所自始宋文與可碑記云院舊名羅漢大中祥符間選僧義海住持五傳有惟簡者力圖崇飭肇錫令號明末遭亂幾燼國朝海宇承平人思舉廢有羅氏維堯馬氏汝麟兄弟依故址而建之維時以道易釋得曹本植吳合慎田教真相承勿替年久漸圯道光間羅金蘄倡募補葺道士高永昇等助之肇役於咸豐辛未次第落成若夫塗丹醇而增崇麗則鄧元林亦與有力焉然則斯廟之歷久而不廢者人爲之也羅君燮臣慮故實不傳將就湮滅屬予爲之記

創修茶神龕記

周毓楡

今將使空洞渺冥之象有所繫屬乎人心以極其奮興鼓舞者其必不能虛懸無著也則有古聖王八蠟吹豳之意在視爲媚神希福陋己興仁場之祀

灌志文徵

卷五 雜記

五十四

茶神始於純廟平定金川募商引茶之日迄今垂二百年而祈報無恆廟貌不具非禮也光緒戊子歲四川鹽茶觀察使者延公旭之念金川一隅商疲引滯整治宜急乃授任劉仲杰麟尹相地定章去商設局茶園積弊漸清辛卯歲劉君解組毓楡適承其乏爰因舊政而損益之狡詐者懲之齟齬者柔之重譯至止者拊循而噢咻之經營所及民夷款洽植秋饗毓楡與祭乃屬茶園戶而告之曰茶神肇於唐沿于宋元盛於昭代地境皆有廟此獨以片楮署位可乎蓋立龕以伸敬衆嚮之於是鳩工集資相度紫雲宮隙地爲位以祀首事黃義泰馮自欽實董其役經始於壬辰初秋閱六月而歲事邦之耆紳碩學且謂祀事孔明競爲詩歌以張之毓楡既樂秉延公之訓觀茗政之成而喜各園戶報本聯歡深有合於八蠟吹豳之旨也乃製迎神送神之曲俾歲時歌以侑享其詞曰神來兮萬山中秋冥冥兮渺長空此邦之人兮

太古風地接要荒兮重譯通崇明德兮報偉功展明禋兮享祀豐無俾茗沃
兮煬突東利我民夷兮永妥侑於無窮右迎神曲紛進兮禱祈肉如陵兮酒如沂
清歌宛轉兮遏雲飛舞衣翩躚兮映夕暉神之駕兮儼欲歸肅靈風兮颺清
輝想像草衣兮是耶非雲月無聲兮空翠微右送神曲

北山行程記

錢毓岷

光緒丙午仲春予出灌治西門由石廠窩迤北踰馬超坪楊柳坪右上土地
嶺左傍白沙河沙灣中花嘴索橋申文坪三扇磨酒店坪縣城至此三十里右上山五
里至柏果岡虬枝糾紛下垂道旁可作挂冠之用焉再下爲兩河口進山之路左進峽口兩
岸山峯巖巖狀若夔巫中通一徑行人稍失脚即墮下飽魚鼈匪徒潛伏於
此亦守土者之責也歷襯腰巖馬蹄石翹望對岸泉滴石上玲瓏如肺然大
小各一懸於巖腰與歸峽內之牛肝馬肺略同渡索橋經七倒拐燕子巖路

灌志文徵

卷五 雜記

五十五

甚險惡過者膽慄魂驚上巖進小溝後聖塔石頂石石筍森峙約十餘里交
汶川縣大岡界傍河行入深溪溝經神仙岡二十五里達獅子坪沿途人烟
稀少昔羅觀察應璠在此小住有樂哉斯邱之志過溝登紫荒坪絕頂俯瞰
龍池宛在釜底右踰塔子坪鄉賢潘明經懷珠曾移住於此訪唐昌謝明經
莘農不遇過二十四盤響水磔爛木溝卽張家老屋基經鵝頸項蓮花石譚
家河邊飛水巖溝口至此約二十餘里左十餘里經黃泥溝爛泥塘上斷斷山山後有路
荒蕪已久相傳可達汶川右十餘里經澗水溝石板灘山露銅鑛隱見不常
人跡罕到再十餘里經收倉坪大紅坡與官防溝古銅廠隔一橫嶺由深溪
溝沿河行經貓壩箭道子馬甲嘴官防溝約計十里進溝經紙廠銅廠鹿子塘約計三十里
上大嶺交汶川縣界循河二十餘里經黑土坡接連下坪中坪上坪人戶
殷繁地亦稍平坦至水井坡路漸崎嶇傍巖行攀流沙坡入漆樹坪坪中一

小村聚頗幽邃蘭香草色撲鼻炫目如在桃源中行也上山阿大方巖仍循河而北經彫橋水坪母猪坪連三坡大拐上連三坪再經鳴鶴堂攬勝堂紫雲堂兩山迴抱儼若藩籬前排長石十餘丈高五六尺可作櫃臺左右二水瀠繞匯流蜿蜒而出下望山王頂如門限然一字橫亘背後大山嶺重複而上近聞獵戶數人踰越二三日直由威州還家有心人入山必深此其地也由上坪過河上爲洪口倚河行經斑竹園甜竹坪小大黃金坪滴水巖炭窰溝涼風頂大火地過河入連三坪之路轉右行經二郎廟養麀店柳葉坪大水溝洪口至此二十餘里近有人在再過桃子岡闔王偏亂石窰罩子橋冽水子鑽金壩頭道河過橋經擔灣桃子坪過和尚橋由大水溝至此四十餘里再六里至圓木棚子由橋左進溝經沙壩大連河桂子巖黃石礪百果莊小連河轉金樓約計六十餘里上大山嶺由橋右三里至劉天官銀洞子夜氣清時微聞古寺鐘聲俗云在縈華九峯山後再進

灌志文徵

卷五 雜記

五十六

牛圈溝雜木林鐵沙巖關山門約計二十餘里又三里燕子巖八里銀廠溝六十里上

光光山遙望文鎮挖藥人等每有古時所修之石梯路徑不知其荒沒若干

年矣按白沙河古之瀨水水經注瀨水出綿道縣玉壘山蜀都賦包玉壘而爲字劉淵林注云玉壘山名瀨水所出則瀨之由西迤北諸山爲玉壘山水爲瀨水可知又按茂州舊有瀨長廢縣瀨水出焉此路其可相通歟

自關門山過河右十五里七層樓又十餘里燕子嶺巖上長有調羹石形如

世人所食之燕窩然下接什方縣白水河尾由洪口踰山而東經杉樹坪小

河坎下慶元洞水與洞平若戲拋石於洞中水聲每響數十沸相傳嘉慶初

設有官廠抽收稅課後爲河水泛溢淹沒銅夫無算左進小溝經關門石核

桃坪高巖灣燈草坪左至鐵佛寺銅廠約二十餘里右八里鞍子坪交彭縣界由慶

元洞衆神廟紙廠經山城牆岩登小縈華山上通牛角池山逕窄狹左右空

虛俗呼貓背梁近人蕭端公創立廟宇並無餘地可建廊廡傳聞常有山君

夜至黎明卽遠颺右通分水嶺七間房石甕子獅子岡再下爲彭縣之普朝

寺由洪口右下山踰溝而南至八角廟天寶洞洞約八九處深約數里內有鑛穴縱橫約皆十餘丈近爲泉水溢注不可遏止銀鑛燦然無法挖取再上高坪大灣石灰窰敲柳樹至山王頂約計十八里南下懶板凳普通寺長河壩爲蒲村進山之路循山嶺而東即古佛殿再二三里至二峨寺殿覆鐵瓦內有石脊屨盤酷肖龍虎乾隆開僧誤琢去今首尾復見靈境儼然又有乾杉一株異香撲鼻攀岩行至火燒山入山之凹處兩峰峭拔聳入雲霄循嶺而西經黃桶岩燈盞窩七星臺蘭花岩象鼻子下馬蝗岡至尖山子乾隆池避世者亦於此卜宅焉南踰山嶺爲墮口石盤龍橋入山之路西下山至塘坎左爲手爬岩距峽內之繩橋不遠右沿河二十里爲大坪銅麻坎貓兒石上即廖家坪下卽周家坪至河脚沈家岩灣再上瓦子坪下金洞子交八角廟洪口界與隔河之上坪相對游覽北山之勝地盡於是矣其物產之蘊於中者則

灌志文徵

卷五 雜記

五十七

有金銀銅鐵諸鑛著於外者則有杉漆茶樸諸樹飛而上者爲鷹鷗鷓鴣諸野鳥走而下者爲麀麋熊豕諸野獸子弟多聰敏樸誠男女少奢侈華美山中之風氣未開設學校以端蒙養只在賢有司提倡勸導則轉移俗習何難於此收效哉

臥鐵記

莊裕筠

臥鐵之設舊矣光緒三年大修都江堰得鐵三其一有萬曆字銜以石其一有數字經水齧蝕不可辨其一係同治三年鑄有績緒遺則之桂六字皆平放堰內庚辰予攝斯篆淘堰時三鐵均如故也甲申歲忽俱不見其秋予又承乏水利乙酉春淘之僅得同治新鐵餘則杳然加工深淘復獲一鐵三面共鑄數十字文如蝌蚪漶不可識詢之士人僉云近百年來未嘗見此予思臥鐵之措堰中也縱橫數十丈間略無確據後之莅任者何從而見之爰置

鐵堰底豎碑山麓以繩度之由碑至河底共高九丈九尺由岸至臥鐵處計二丈一尺嗣有欲知臥鐵者如法量度卽得如其沉伏不見以高下丈尺計之猶歷歷在目云光緒十一年署成都水利同知莊裕筠識

壽客亭記

王昌麟

吾友謝子丕承其居家也儉以約其持躬也謹以畏顧性篤好菊距廬之右闢地數弓得菊數十百種於其間審葉知花剖萼釐幹勻黃布白鋪紫綴緋整齊其行列曲直其畦徑作亭於其上而蒔菊以環之咫尺之區往復廻環若有不可窮之幽概亭臨北江分流處秋湍箭駛長風送浪則足以刷盪耳目澡滌神明北望靈巖諸峰橫於天際宛若畫障其煙雲起伏陰晴萬象令人目注而神與翔至於朝曦夕月隨人升降萬花環列雙瓶對斟溟滓一氣茫不可辨客或倚欄或據石俯而茗啜仰而賦詩清香繚繞衣帶間忽忽不

灌志文徵

卷五 雜記

五十八

知身在何境也秋日花時余聞其盛亟往游焉其尊人茂齋公年逾八秩白鬢飄拂從曲徑扶杖彳亍而來體態偉且逸見客止勿爲儀謝子侍其側摩狀揣名品香論色仰視其尊人與客皆樂盛客睨謝子亦樂甚已而老人出謝子隨而扶掖之反顧余而笑曰先生知余名亭之意乎余曰是不惟菊爲壽客之謂蓋謂夫老人之日涉茲圃以爲娛也謝子笑曰諾余於是知謝子不惟菊之好蓋以娛其老親而致然也昔孔孟之論事親也曰能竭其力曰養志守身今何世也捐其身以殉無厭之欲者多矣彼將曰吾以養吾親也果其親之志歟抑或有汗其親者存歟謝子獨歛其材能不敢馳騁於當道顛顛焉用其力於一花一卉之間殫百日之勤以成九秋之賞其尊人願而樂之若不勝其欣慰也者若是謝氏父子之賢於人也亦遠矣客有韞余言者請以揭諸楹間以俟吾黨之游於斯者商焉若夫道足以拯時之窮而登

斯民於仁壽之域是又登斯亭者當風臨流而感歎懷想者也余曷引其繩乎哉

先生讀書臺記

李景福

先生諱履坦清貢生靈巖其字也先世承奉公明麻城人總兵建昌僑於灌世以耕讀傳家先生幼而勤學入庠後授徒四十二年文學寓於孝友從游日益衆科舉聯捷猶未事沒後奉祀邑鄉賢祠其門人灌縣高溥潘懷珠亦從祀鄉賢崇寧山有仁愈念劬曾沂泗焦玉堂羅錦文楊汝舟胥星階從祀崇德祠灌縣董文炳從祀貴筑名宦宋煊從祠江北名宦高溥並從祀澄邁名宦君子榮之先生嚮學於中江黃公梅其設教於靈巖山也器賞之曰汝他日品望期與此山竝重因以靈巖字之黃公歿先生親營喪事卜葬於蒲陽山歲時致祭子孫至今不輟嗣又從羅江李訓導超游結廬於類鼓坪間

灌志文徵

卷五 雜記

五十九

登山頂悵望蒲陽師墓每歎歔涕下其篤行足敬慕如此先生學既久無書不讀尤端改制裁後頗有訾之者不知明清兩代名儒碩輔類由制藝而達於理學發爲事功蓋趨嚮正而人材始端也卽以先生論師弟之間蔚然時望生而矜式歿而馨香以視浮詞浪說無關風教何啻霄壤先生歿後七十年邑人士請於邑宰建讀書臺以標景行福適權水利獲仰高風因以公請題碑竝記此爲之頌頌曰學以教人匪師何用學以致用失教則縱經籍之榮子孫之奉以是爲先生重

石田記

羅世勳

都江自離堆出峽水勢湍悍支渠遞分數且踰十其正東流者曰徐堰河距灌治三十里而近田家橋跨焉清同光間淫雨連旬狂瀾蕩涌漲增數尺隄不能防河道改遷橋亦隨圯昔日田廬或漂沒於駭浪洪濤不能得其髣髴

蓋水利變爲水患矣予家別業傍河未購置時已被沖刷嗣復罹災十之二三自南移北隔岸相望一水盈盈非意料所及也無何石灘隆起隱見於煙波浩渺中宛若疏星麗銀漢遲之又久汶港分歧略可辨識嚮之如箕如篲者忽焉而洲而沚互相併吞數日減而形愈擴從而淪之滌之壅之斃之殺水勢堅岸基灌木叢生與時俱進林樾礙日輒斬爲薪如是者復有年淺草平沙寢多腹壤人之見之者皆以爲桑田在即矣雖然豈易言哉今夫剝復者天心而消長者人事天之所廢不可支也天之所興不可棄也貪天之功宜萃人力於是召傭役具畚鍤相形勢畫方隅高者削之窪者平之畛以別之洫以通之截長補短因物賦形中矩中鈎鮮有甌脫南東其畝在水之涓我理我疆已越強半其不可得而田者幾希焉又豈始願所及乎經營締造亦越數年水由地中土膏墳起於田爲中下當夫凜秋暑退熙春寒往禾黍

灌志文徵

卷五 雜記

六十

油油被於隴畔雨暘休徵不害嘉穀倉庚拂羽鸚鵡先鳴幾忘其爲鷗鷺嶼者蓋水患復爲水利矣嗟夫昔日平疇淪爲澤國今日沙磧蔚作畦塍滄桑迭更此其一例有始有卒焉知來者之不如今是固未可忽之傳曰得志於齊猶獲石田喻無用也乃今知不然矣作石田記

書岳氏事

羅世勳

嗚呼若敖其餒寧細故哉苟能承續大宗則無後之罪免矣予族姊適岳氏生三子而寡鞠之成立授室析居仲叔相繼逝伯僅一男礙兼祧縻不恤緯而憂宗祀之缺然無如何也伯氏奉母命納妾育二雛先後爲仲叔嗣既如願妾不復育殆若天所相焉三房各持門戶議所以膳妾者妾卑且愿亦幸得溫飽矣無何伯氏之子天姊念大宗集家人議俟仲氏有孫則入繼復如願乃踐約絕續之交間不容髮不尤奇哉予始終與聞其事一門三節俾熾

而昌委曲求全足式閭里書之以告采風者

駱文忠公大破藍寇於石羊聚記

朱谷暘

咸豐十一年秋滇寇藍永和率廿餘萬衆圍綿州駱額門宮保秉章督師入蜀以所部楚軍敗之圍始解寇狼奔豨突於九月朔乙未由彭崇竄入灌之河西鄉團迎戰披靡賊焚殺擄掠不可勝計老弱婦孺死事尤多前進士高公城南練民兵衛境急率衆退保西山賊追至青城之牌坊岡義士徐開龍力戰死之一時紳耆多抗節與難者餘民各衛老弱奔散四方城邑百里之間雞犬無聲寇既入河西以其地殷饒背山帶河形勝可據謀以太平爲巢穴以石羊爲門戶餘寇散踞各村爲羽翼自石羊塲至柳街聚縱橫數十里碁布星羅無地非寇其渠方集優人演戲爲樂縱寇四掠遺積宮保偵之檄胡軍門中和率諸軍兼程疾擊進渡羊馬河分道夾攻北由馬祖寺范家橋

灌志文徵

卷五 雜記

六十一

入東由李家橋柳街聚入搏戰數里直抵石羊燬其門戶各村諸寇相繼驚潰官軍併力追擊至沙溝河而還斬馘盈野出難民無算時寇方銳意搜掠不意官軍突至及礮發靚煙燄回援石羊官軍阻水爲營復却之乃扶傷救死折回巢穴沿山宵遁邑侯辛公收寇屍三千餘具爲京觀焉是役也微駱公力則軍不速至軍不至則河西委寇河西陷則灌邑委寇灌邑陷則上梗松理懋諸道而爲省垣腹心之患矣公神機獨斷銳於乘勢迅若疾雷不三日而河西平成都獲安越數年公薨於位鄉人戴其德不忘祠於聚之粵東館春秋祀焉古所謂能捍大災禦大忠則祀之者其在斯人歟其在斯人歟

堰工祠記

錢 茂

有農田隱君子問於水利主人曰凡事之成在端始端始何在曰在築基基之成也久則敗後之起而維持者又何宜曰宜補漏隱君子曰甚矣天下事

基成而終敗者皆漏之一字誤之也能補漏以復始基則天下平矣奚獨灌
江水利哉况水利者利在堰堰利者利在河繇河灌堰繇堰灌田以條分縷
析而達於所統之一十四屬則綱紀於河與堰之民其奸者不辨而僞作矣
其良者不通而隱隔矣於是利在河而河漏利在堰而堰漏河與堰一寓夫
民則民之僞不辨而僞漏隱不通而隱漏數漏交作而水利不堪問矣水利
不堪問舉凡治水利者與有責焉使君其有意乎主人曰噫吾子所言皆余
意計事而早爲之簿正者也河誰司司於正堰誰主主於長民僞誰辨辨於
調查民隱誰通通於研究因是而委河正因是而委堰長因是而設調查所
因是而設究研所兩所設而民僞辨民隱通矣兩委定而責成專水害除矣
所以河流不溢而河之漏補堰水不涸而堰之補漏民僞不作而僞之漏補
民隱不隔而隱之漏補則向之水利不堪問者至是或無愧焉雖然事非親

灌志文徵

卷五 雜記

六十二

歷者不知難病非身受者不知困當戊申冬季余權任來斯嘗私計曰是先
人之舊治也雪泥鴻爪兩世因緣灌於余不加厚乎余何敢畏勞焉江干督
工風饕雪虐波濤嚼心折骨驚况灌江爲出水之區而治工又以嚴冬爲
吃緊治一不善則來春洪流汎漲其受害反較他屬爲烈故從前外河一帶
冲毀良田以數萬計前縣令某與權斯任者有鑒於此乃通稟各大憲於受
害之區分設水當水當者免除雜捐於正供外祇就地丁稅每分上錢二十
留作河工之用見分六當曰沙溝惠元懷德惠濟新河均濟內有二當係先
大夫所稟設者尤余耿耿焉不能暫釋者也時移勢異百弊叢生六當所留
之費半入豪強前縣令趙金鑑稟歸津捐局代收每年幾至千金而借工請
費者紛至沓來於是每請一次而筦局者扼其半請費者又扼其半即以費
財興工亦不過假塞衆口所以河不治而河漏如故堰不修而堰漏如故民

之僞不辨而僞漏如故隱不通而隱漏如故故歷年爭水之際民則蟻聚草野蝟集公堂咆哮交作大傷政體甚有因利乘便挾貨入城以希免釐稅者前丁文誠憂之奏請十萬金錢飛灑灌口兩江變竹籠爲石隄意欲竭一勞以安萬古不知自冬徂春僅三閱月而迫時短者事多荒矧灌江如此之難且鉅耶春潮隄發前業盡壞河神貽災釀爲京控嗚呼文誠之心苦矣而民情亦大可畏也余所以事必親歷疾如身受凡河不善者必指畫以善之堰不良者必督責以良之民僞不辨者必剖晰以辨之民隱不通者必洞達以通之赤心可以感人衆擎乃能舉事此余於河堰兩工其期限雖如故而其工視常年略加密者則斷斷乎可自信焉且爲公家歲省千金之費而後清理各當每年例捐之款一仍局收而自主之事畢計算則向之局收不滿千金者茲增至二千金有奇蓋乾沒去而實際出也至一年河堰兩工民之修

灌志文徵

卷五 雜記

六十三

補若干出付若干則責成調查所釐清揭示通衢以昭公信人力可恃而天演無權今歲水漲至十七晝各屬俱安然無恙且無一人以爭水來告問諸野老遺賢僉曰是河正督河工之得力也是堰長率溝長之盡務也是研究所辨民僞之勞思也是調查所通民隱之獲實也吾屬頻年水案不湮即涸而必如今之洋溢滂沛晏然無驚者皆前此所未有也况歷年截水橋槎飄流必盡今存二十餘架且有生梯以疾流湍汎之中而枯本何以定根不定根又何以句萌條達此數十年難見之事而今見之天人相通祥瑞立應謂非使君治水之力而何以能至哉隱君子聞之而怡然曰使君之功懋矣舉其一二年來所委所設等可以對國家可以對黎民可以對親庭之訓可以對後任之賢留遺惠以作息壤嗣之踵其事而增華者又安見非使君功哉余曰噫余何功焉秦守父子尙矣後此有功於堰者歷世均不乏人因詳請

於二王廟側改建堰工祠祐且以祀其政蹟則裁成小傳勒有專書以備掌
故此余於斯任稍竭繇薄者亦不過盡一己之責而已敢就所爲勒石以告
後來者懷寧錢茂謹記

巳酉書事

錢茂

是邦乃先大夫舊治士民猶念甘棠戊申冬捧檄來權水利苦心經營堰務
時懷先芬不遺餘力巳酉春工竣江水暢流農業振興上游以費少工多褒
之冰淵益愼民望時雨爲之禱於靈巖白龍與李王神祠神靈顯應甘雨屢
降寶瓶水則八晝以上四民皞皞占歲有秋謹志勒石以答神庥宣統元年
皖江錢茂識

丁亥入都紀程節錄

黎庶昌

光緒十三年丁亥閏四月初一日入灌縣界經崇義舖十二里過盤龍橋又

灌志文徵

卷五 雜記

六十四

一里聚源場俗名新場三里過羊子橋橋側有漢中郎將文園令司馬相如
墓道碑墓實在離縣十二里之劉海壩又十四里入灌縣城宿東門外有關
鳳樓及文翁祠城內外長街一條可三里爲通茂州松潘孔道往時藥材布
匹皮貨生意繁盛夜中如市故俗有小成都之稱城在玉壘山麓志云縣西
北十里有靈巖山中峰峻聳左右微低如壘字狀石上鐫玉壘龍津四字右
列青城左繞天彭諸山爲省會發脈之地常璩曰以玉壘爲城廓左思曰包
玉而爲宇郭璞曰玉壘作東別之標其信然矣山之高大與吾鄉金鼎山彷彿
靈巖夜有燈火或遠或近金鼎亦如之可見山高大而靈者皆如此不足
異也青城山距縣尙四十餘里晚有貿易同鄉數人來見詢問先曾祖梅溪
公墓在北門外竹林寺後官山當時吾祖授徒鹽商曾氏灌人尙有能言者
近以舍間代有科名遂羣推爲發墳豈知先祖長山公省墓時初次欲遷無

力繼以年代久遠不敢輕動蓋人子慎重之至非有風水之見存於心也是日晴閏月初二日住已刻具酒饌往掃梅溪公墓同鄉平遠壩人楊度爲導出北門里許即竹林寺又過一乾溪卽官山俗名新亂墳見有石桅雙立者吾祖墓在焉近前審視墓之前後左右叢葬皆滿無一隙地行禮陳饌均在他人墳上他人之拜掃者亦須履吾祖墓上以繩度之幾至棺與棺相摩直無法可以禁止正面有碑乾隆四十八年癸卯秋長山公初次省墓所立字漸剝落額題良山坤向墓左側一碑嘉慶二十三年戊寅中和月長山公第二次省墓所立其敘云先府君諱正訓字會友號梅溪黔之遵義人四十二歲游學西蜀四十六歲歿謝灌縣子三人孫男三人孫女六人某自乾隆四十八年來川修墓後迄今又三十六年率次孫某復修塋蔭某謹誌之碑右嘉慶以後乏人來川至咸豐末年從兄兆從祺姪汝勤光緒七年胞姪尹融

灌志文徵

卷五 雜記

六十五

復來省墓至是凡六次墓之後脈由玉壘山左幹拖下其右幹則由西蜿蜒而來南結縣城墓向正對二王廟後山頗似盞蓋形城跨其半左一峰卽文廟後山東面皆平地事畢入城至貴州會館略坐館頗寬敞往游二王廟出西城玉壘關循河街西行廟在山麓層級而上雄壯華麗殿前有紫薇二株高丈餘道士編結如掌扇對立廟以二郎居正殿而蜀守李冰反居後殿殊覺位次不倫同治中成都將軍崇實著總督別建殿於伏龍觀改易位次是也有記甚當山下有丁公祠供文誠長生祿位塑像頗肖今易額曰賢良祠再西則竹索橋長百餘丈又西爲都江堰江西有洲迎水一面以石砌作魚嘴形使分水勢爲兩派再用三叉木植立水中接出數丈填石成埂冬令水枯欲修左則塞斷右派修右則塞斷左派然此尙在離堆之上流入城復出南門過普濟橋至伏龍觀後亭離堆離堆者玉壘關之虎頭崖拖下一小山

也其山皆石高不過十丈江自西來順虎頭崖折而東南行冰鑿開崖石窄處可四丈寬處可六七丈長可二十餘丈引使北行分灌川西壩十餘州縣因勢利導故其利甚溥崖脚刻有深淘灘低作堰六大字已爲漲沒未及見正對離堆鑿處水則尙存皆明盧翊重刻者按元史河渠志南江北江皆自都江堰東行北本無水李冰鑿離堆作堰以豬洪流至三泊洞醜爲二渠所謂穿二江卽此溉田以億萬計又云北江稍東爲虎頭山爲鬪鷄臺有水則以尺畫之凡有十二水及其九則民喜過則憂沒則困又書深淘灘低作堰於旁爲治水法皆冰所爲也余謂冰書當是秦時小篆假令今日而在其可貴豈不與石鼓並垂余又謂江自尤溪口東出地勢西北高東南下故水皆迅流奔激所經過郫灌百二十里間平疇廣野渠澮縱橫壅泄如意卽此可觀先王溝洫之法冰之爲此匪惟人事亦由深得地利耳離堆之尾久爲水

灌志文徵

卷五 雜記

六十六

所決平今有人字隄護之都江堰順流至普濟橋下可二三里河分數派兩岸隄石縱橫如魚鱗層累有用圓石疊砌者有用竹籠長三四丈橫置岸濱以石填入者皆丁文誠之所爲也是日上午晴未申間陰雨夜大雨閏月初三日往游青城山道家所稱第五洞天寶岷山之首峰自此連嶺而西直至江源皆岷山也出西門過索橋十七里至玉堂場並江東行又五里折西可十五六里爲長生宮范長生隱居處再西北入山峽盤折而上至半山稍平處新建一碑題曰義士徐開龍死難處同治年間禦藍大順股賊者又三里林壑幽曲抵天師洞殿宇無多後一石巖高聳道士云山後絕壁如削成青城得名以此左偏對面峰曰丈人觀觀旁有漢張道陵墓實無跡可尋四周屏障環列不能遠視余頗失望客堂外銀杏一株極大合抱可四圍樹腰皆成鍾乳天師洞卽在其下洞甚深乾隆間因羽士之流多入而不出官遂封

閉後有關帝殿殿旁一池極清淺石闌上刻古六時水天福四年八字再上則虛靖天師殿道陵三十世孫名繼先字嘉聞道號修然子宋元祐中賜號虛靖前殿兩壁摹刻岳忠武書出師表又有洪武御書純正不曲書如其人八字左轉卽石巖巖有一洞唐碑在其中碑高約三尺寬一尺七八寸明皇行書文云敕益州長史張敬忠頃者西南阻化徭役殷繁山川旣接於夷戎縣道比平有勞於轉輸自卿鎮撫百姓咸安革弊遷訛良多慰沃歲陰寒極安好今賜卿衣一副至領之蜀州青城先有常道觀其觀所置元在青城山中聞有飛赴寺僧奪以爲寺州旣在卿節度檢校勿令相侵觀還道家寺依山外舊所使道佛兩所各有區別今使內品官毛懷景道士王仙卿往蜀川等州故此遺書指不多及別署大勅字又署十一日三字首一行題大唐開元神武皇帝書常道觀主甘遺榮勒字及題晉原吳光達末三行題開元十

灌志文徵

卷五 雜記

六十七

二年歲次甲子閏十二月十一日下十三年正月一日至益州二日至蜀州專檢校刺等官節度使判官彭州司倉參軍楊璿蜀州刺使平嗣先青城縣令沈遐川皆隸書碑陰系開元十八年六月七日韋縉等奉旨齋醮題名今別摹刻前殿勅與題名共列一面可觀祇此而已是日陰閏月初四日住余昨在途中望青城諸山雲霧難辨私念此行不能如昌黎之開嶽雲東坡之禱海市亦是虛游是晨忽晴霽早飯後令一道士爲導步行操筇杖由石巖後紆折而下經擲筆槽復攀援上升約三里許至第一峰始開朗然北面爲趙公山所限西面缺處僅見遠山數峰惟東面可縱觀耳量其山之高似尙不及吾鄉金鼎山眼界之闊亦遜只巖壑中樹木濃翳生氣勃勃較勝一籌青城名著寰宇所見殆不逮所聞然則吾向題金鼎山曰小峨眉又題曰三十七洞天及題飛雲巖爲七十三福地皆足以發山水之靈奇蓋自唐道士

杜光庭死無復有能主張山水者矣岩壁上橫刻青城第一峰五大字前建昌道黃祥人雲鶴所題道士乞留名余書數行云光緒丁亥閏四月入覲道出成都至灌省墓遂游青城登第一峰瞻望岷峨以攄吾抱前出使大臣遵義黎庶昌記因指示令刻此壁上不知果能如約否又過朝陽洞里許至上清宮小憩觀麻姑池迤邐下山又四里餘與來路會遂歸同鄉數人邀飲并餽青城茶是日晴閏月初五日行出東門謁文翁祠祀甚朽敗三十里崇義舖乃出灌境

得檀園先生遺稿記

游觀

此稿乃余外祖衛公檀園先生所著不知為誰鈔錄册面但書湘帆置想亦心契先生者友人羅子孔之拾而藏之有年矣余追念先母遺命求遺稿刊之而文集佚其半羅子聞之亟出以相畀誠意外之遭也先生以理學自勵

灌志文徵

卷五 雜記

六十八

年三十舉乾隆丙午科鄉試第一意在必行其志而躡躑終身復以繼述無人致遺篇未傳舊稿幾盡脫非羅子則先生之道德文章不幾無所徵乎幸而不終沒者羅子之力也羅子名世昭少隨其尊公綺樓先生宦渠邑相遇甚疏今以余次子道祥為若弟烈堂茂才壻因厚焉不然雖多金何從購得彼蒼殆假手於羅子將以誘迺後進歟光緒戊戌春三月十二日灌陽游觀記

伏龍觀避暑記

集句

陳月舫

伏龍觀山

灌縣志

今灌縣之離堆也

陳懷仁川主三神合傳註

地當南城西

梅曾亮江亭消暑記

有瑰偉

絕特之稱

設陽修新修滕王閣記

僕因夏日

王勃九成宮東台山池賦

若墜於爐

房子里廬陵所居竹石記

遂遊焉

微山記 以避炎氣

通鑑馬援進營壘頭段

及其至也

中 有門

元好問惠遠廟新建外門記

環以長垣

金蕭貢重修北極宮

記 隨而深入

漢書趙充國傳

中有一殿

史記封禪書

其額題云

文禮愷射洪金華書院記

萬世水賴

書規

模宏偉

傅堯俞書治淮巡檢廳壁

貌象顯嚴

朱熹衢州江山縣學記

其雄麗塊地

李白任城縣廳壁記

鮮有如此者

歐陽詹曲

斜迤而東

宋濂石洩山水志

又至一門

舒元興國序記

入之

左傳哀二十七年智伯入南里段

地明迴爽

潔

宋濂看松菴記

殊可人意

宗臣報徐子與書

其西南

元順善順州儀門記

大書曰

楊慎新都八陣圖記

川西第一奇

功

志

字大二尺

王禕開先寺觀瀑布記

體法雄妙

謝絳游嵩山寄梅殿丞書

又前

宋本水木清華亭記

有堂

劉敞東平

學郊池

旁一小室

王世貞答般無美書

對聯云

向熙辰芙蓉墨池書院台記

一粒粟中藏世界

呂純陽詩

數重

花外見樓台

王廷珪詩

其內則一几數榻

洪亮吉鉏月閣記

可以供茗飲

黃淮書

入於室

左傳

成十年晉

啓牕而觀

魏學伊核舟記

前有平地

白居易廬山草堂記

後枕城郭

屠隆與王辰玉書

驚浪雷奔

駭水迸集

木傳海賦

信靈境也

馮時可上大司寇徐先生書

出之

史記游俠列傳

又拆而北

河焯題渾一殿上書屋

殿

深靜高爽

李賢賜遊西苑記

神龕之上

牛樹梅重修大成殿碑記

以像實其中

任原蜀主廟記

冠裳宛然

諸葛武侯

問其神

厲鶚屠墟廟志

曰

胡稚威王大夫述

李公諱冰

陳懷仁川主三神合傳

予爲兒童時

茅星來遊唐兵廢閣記

嘗聞先大夫言

劉游祁西山記

冰知天文地理

華陽國志

隱居岷峨

劉沅李公父子治水記

當秦始皇

灌志文徵

卷五 雜記

六十九

三十六年奉命治蜀

向京城新刊川主五神合傳序

到官未幾

朱松代人上郡守書

手足胼胝

史記李斯傳

以避

沫水之害

古今集

又穿內外二江灌漑田疇

杭愛二王廟記

噫

韓愈書記

山鑿離堆堰築都

江

四川巡撫張士佩祭蜀守李公祠文

遂至沃野千里民食豐裕

四川巡撫碩色請修石牛堰疏

爲之立祠以祀

唐順之常熟縣

二烈

不亦宜哉

呂溫諸葛武侯廟記

少憩

揮塵錄

又折西行

石渠記

見一處

鄭遠古杜子春傳

有一

隴道人

陸可教南旋與館中諸年丈書

年幾五十

朱梅崖齋音序

作悽惻狀

楊寶柳邊紀略

問之

歐陽修與梅聖俞書

時事

全不知曉

吳海投鄭彥斌書

俗態過於市井狗屠

馮時可奉徐大司寇書

復前行

桃花源記

得享馬

人紀

亭不盈丈

莫雲卿長林亭記

四面豁敞

李賢賜遊西苑記

男女老幼

沈林文齊故安陸昭王碑

多會於此

范仲菴岳陽樓記

予立其上

舒元興國序記

可以樂暇閒

陳驤臨川橋記

可以眺遠山

楊起元高通判泰岷書

清風

溲然

陸九淵與傅季魯書

如八九月時

白居易廬山草堂記

不知有暑也

劉大魁百門泉記

久之

戴錫夫雙慶寺玉蘭記

將夕

宋游遊鍾山記

侍者曰

左傳昭二十二

可以去矣

明史楊濟傳

不然

左傳襄十年

城門已閉

通鑑曹爽

將奈何

百羽本記

余應之曰

韓愈與崔羣書

方今夏暑

通鑑曹操擊討烏桓段

既來安得不少

留宋史常秩傳遂因留宿

陸可教南旋與館中諸年文書

是夜

唐書張良姊傳

一覺美睡蕭然無夢

屠隆與陳於立市書

是早寢晚起

張元竹與某某書

無所罣礙

薛應旂答葉教諭書

一日復一日一朝復一朝

韓愈詩越

二日而返

方苞遊雁蕩山記

既還

韓愈唐河東府法曹張君墓碣銘

作為斯記

吳錫麒大通橋春泛記

以志感云

洪亮吉城東酒

墟記

香積寺記

羅元黼

青城山東十餘里為香積山有精籃曰靈巖寺即周地圖之通靈巖寺也年代綿瓞遂直以山名寺矣寺為雞骨禪師道場西魏時卓錫於此闢莽荆建傳有米漏石罅以供齋厨師嗜食雞歿時雞自口出飛鳴而去其一墮地缺股知侍者竊食叱令吐續雞復飛去此與唐鴟鴞和尚事相類古德示異所由被通靈之目歟山最高處矯焉特立名孤鶴頂其下岡巒競秀長林蔚蔚幽篁曲澗隔絕塵囂寺居其中別有天地入山石梁曰雞香橋巖瀑飛流曰

灌志文徵

卷五 雜記

七十

五疊泉左右二亭曰摩雲虎嘯又有龍門洞觀陸游詩所狀峰撐蒼昊壑裂厚坤穴吹腥風壁挂爪痕信為奇絕池名雞骨清可鑑影云昔禪師濯足處面龍池水最甘冽故老傳有龍出於此地如石能化虎能點頭或後人借遠生二公故實略為點竄無俟深求要茲山名勝自務觀留題久已膾炙人口師靈塔尚巋然來遊者摩挲苔蘚恆想像當年示寂之異焉緇流宗派明以前不可得而詳獻賦之亂頽殿僅存梵鐘歇響清康熙初釋照泰臨濟宗也始來是山披榛置鉢其嗣法若普亮通義通敏真地然程法明戒寬了達悟毓心昆宗照宗秀祖祖長祖德凡十一世其有績可紀者通敏為最殫精締構越二十載開堂傳戒大振宗風祖長繼之亦恢厥緒祖德嗣作補綴多端古蹟用新以迺來者祖德新都人原籍山陰俗閔姓少春其字嘗階武秩中年做屣世緣感喟滄桑皈依淨土承衰敝之餘獨肩鉅任俾初地重光視清

初鳳之林竹浪無多讓焉禪師冥漢慧觀當亦多其弘毅也記曰莫爲之前雖美弗彰莫爲之後雖盛弗傳詎不信與

太平橋百魚嘴記

全澤

傳有之曰太上立德其次立功夫功與德豈易立哉禹平水土功在天下冰鑿離堆功在全川洪水猛獸之患以除溝洫農田之利斯溥其膏澤下民之大小雖殊而偉烈豐功同爲百世不沒則一也都江水利代置專官數千年來規模備具然河道之變遷無常水流之傾向靡定因勢利導責有專司徵諸史册秦漢而降從公都江者不乏良吏勝清同光間川督丁文誠諸公遠鑒及茲奉頒庫帑分期大修其重要之工程如新工魚嘴飛沙堰人字堤太平堰均改竹籠用石砌築以期一勞永逸免歷年虛擲巨資意至美而法未盡善故一經急流如矢之水致費數十萬金數易寒暑之工程冲刷殆盡逮

灌志文徵

卷五 雜記

七十一

至今日祇太平橋下巍然峙立之所謂丁公石魚嘴爲魯殿靈光耳夫功之立抑何難耶民國肇造干戈頻興民力雖竭于供憶國家仍窮於羅掘凡百政務諸歸停滯癸亥秋水利知事官公受命於經費奇窘之際洪水泛濫之餘罅漏補苴匪易易事公毅然任職挪借撐持除援案應修築者外復改良官民各工若太平堰石魚嘴其特殊者也考太平堰魚嘴爲岷江自離堆東注之第一關鍵右分走馬左分柏條蒲陽諸河灌溉灌郫溫雙新新金漢崇彭成華十二縣農田危立江心迅流直射向以竹籠堆砌夏汛暴漲立見沖沒下游各縣屢憂旱澇丁公備石改築意期永固乃防禦未周旋復爲洪水漂木所毀損官公謀恢復舊制悉心規畫切實施工甲子冬鳩工庇材乙丑春歲事其魚嘴之位置當原有基址退二丈許前樹人字形正副樁十二外加副樁十二頭樁高盤龍二丈副樁高齊盤龍空間密樹短樁一排其後身

左方樹逆水護隄椿十一以防漂木之衝擊銳其頭而層其級以殺水勢工
既成報省署備案俾後之任職者有所遵守茲幸洪水迭經未遭隕越可告
無過於邦人澤忝預斯役亦與有榮焉

灌志文徵

卷五 雜記